

DE MUTATIONE  
NOMINIS.  
M. ANTONII  
MAIORAGII

*Oratio Iudicialis, qua variis ra-  
tionibus probatur vnicuique  
licere sibi nomen immutare.*

BIBLIOTECA NAZ.  
ROMA  
VITTORIO EMANUELE

# ORATIONIS

## ARGVMENTVM.

**M**ANTONIUS Maioragius accusatus a Fabio Lupo, & a Macrino Nigro, in Senatu Mediolanensi, de nominis mutatione, quoniam prius Antonius Maria Comes dicebatur, expositis primo vitæ suæ rationibus, probat, & à legibus tam diuinis quàm humanis, & a communi consuetudine, & ab ipsa honestate concedi, ut sibi quicumque voluerit, modo ne fraudis alicuius gratia faciat, nomen immutare possit.

126  
Illustrissimo atq; Maximo Cæsaris Consiliario,  
Subscriberiq; dignissimo, Francisco Tabernæ,  
M. Antonius Maioragius. S. P. D.



**Q**UOD hætenus in tuam familiaritatem, quam opti-  
mus quisq; vehementer expetit, vir ornatissime, celeberris-  
meq; Franciscæ, non diligentius insinuare studuerim, ut tua nunc  
demû mihi cognita et perspecta summa benignitas in me postulabat,  
non sanè mea me voluntas, sed istius tantæ dignitatis tuæ splendor,  
atq; magnitudo prohibuit. Cum . n . tibi principes huius ciuitatis,  
tibi auctores publici consilii, tibi omnes quicumq; dignitatibus ex-  
cellunt, ob incredibilem virtutem, atq; sapientiam tuam cedere li-  
bentissime viderem, non arbitrabar mihi infimo quidem homini,  
sed tamen tui nominis amantiſſimo studioſiſſimoq; locum vllum  
apud te fore. Sed posteaq; et ab illustrissimo, maximeq; Reues-  
rendo Antislite Angelo Arcimboldo Nouariæ Episcopo, patrono  
meo, et a nonnullis aliis fide dignissimis hominibus intellexi, quam  
bene de me, meisq; studiis et hoc tempore sentias, et semper antea  
senſeris, quamq; liberaliter honori meo, gloriæq; faueas, statui  
aliquod in te grati animi mei, summæq; obseruantia signum extare  
oportere, quo paulatim si quo modo fieri potest, gratia tuæ adhæ-  
rescam. donec tandem cum idoneam nactus occasionem fuero,  
singulares atq; eximias virtutes tuas, inauditas antehac ingenii suauis-  
tates, admirabilia rerum agendarum consilia, summam in adminis-  
tranda Rep: iusticiam et æquitatem, ceterasq; præstantissimas  
animi tui dotes, quibus te iure optimo cuncti admirantur, suspiciunt,  
diuinis propè laudibus in cælum ferunt, grauiore atq; ornatiore

stylo describam . Hanc igitur iudicalem orationem de nominis  
mutatione, quam à detractoribus quibusdam meis stimulatus, Sa-  
turnalibus proximis elucubratus sum, duplici potissimum de causa  
sub tuo nomine apparere volui . primum vt inclinatam iampridem,  
atq; propensam in te voluntatem meam, maximamq; obseruantiam  
aliquando tandem agnoscas . deinde vt nouum hoc orationis argu-  
mentum, nunquam antea quod sciam ab aliquo tractatum, nōnul-  
lam ex clarissimo nomine tuo gratiam, atq; venustatem accipiat .  
De ipsa autem oratione tantum tibi polliceri possum, me ita in  
ea laborasse, cum admodum sterilis esse materia videretur, vt non  
recusare audeam, quo minus tantum de ingenio meo detrahatur,  
quantum de eius arte facultateq; detractum fuerit . quod enim me-  
ditatione, quod industria, quod labore consequi potui, totum id omni  
cum diligentia præstiti . totis deniq; neruis viribusq; contendi, vt si  
nō profusus, at aliqua ex parte saltem te dignum hoc munusculum  
meum esse videretur . quod si tuo iudicio, tuaq; approbatione, quod  
vehementissime cupio, nōnullam ingenii laudem consecutus fuero,  
nihil penitus aliorum iudicia curo . tu enim mihi certe vnus instar  
eris omnium . sin autem ( quod nolim ) res ipsa meis optatis tuæq;  
expectationi nō responderit, erit tamen humanitatis atq; prudentiæ  
tuæ, animum hunc tibi deditissimum, studiumq; in te meum non  
aspernari . cum præserim à sapientissimis atq; eruditissimis homini-  
bus iam olim pronuntiātū sit, in arduis atq; difficilibus rebus etiā vo-  
luntatē solā sufficere . Vale, patriæ nostræ lumen et ornamentū .  
Mediolani, Idibus Ianuarii . M . D . XL VII .

# DE MUTATIONE NOMINIS.

M. Antonii Maioragii Oratio ludicialis, qua variis rationibus probatur unicuique licere sibi nomen immutare.

BIBLIOTECA NAZIONALE  
ROMA  
VITTORIO EMANUELE



V M ita vitæ meæ rationes ab ineunte ætate suscepissem, Patres Conscripti, ut et parentum meorum optimorum hominum consiliis, et præceptorum, quos mihi plures, et eruditos habere contigit, institutionibus, et naturæ etiam ipsius instinctu, quam semper tanquam optimam ducem mihi sequendam esse statui, omnia fugiendæ turpitudinis, et honestatis adipiscendæ causa, mihi facienda esse statuerem, ut non ocio, sed labori, non libidini, sed industriæ, non inertia, sed ingenuis artibus me natum existimarem, sperabam fore, ut non solum ab aduersariorum meorum accusationibus, quos mihi semper, propter eam, quæ cum eis mihi est, collegii societatem, et colendos, et obseruandos esse censui, sed etiam à maleuolorum hominum oculis, et ab omni denique reprehensione, totius vitæ meæ cursus tutus esset perpetuo futurus. Quid enim aut accusatorum calliditatem, aut obrectatorum calumnias ille pertimescat, qui rectæ voluntatis conscientia munitus, primo neminem vnquam sponte læserit, deinde pro virili parte semper quam plurimis prodesse studuerit? Sed profecto nihil est tam integrum, quod non arguere, nihil tam sanctum, quod non violare,

nihil deniq; tam munitum, quod non expugnare, vel nocendi cupiditas, vel inuidia conetur. neq; enim si quis diligentissime quærat P. C. quicquam aliud in causa fuisse reperiet, cur aduersarii mei tam in me acriter exarserint, tam infensi, infestiq; sint, vt omni ratione, quò iure, quaq; iniuria me inuadant, de me, fama; mea detrahant, me accusandum in iudicio coram vobis esse censeant, nisi quia tam breui tempore, tam repente, præter spem atq; expectationem suam, hac in literarum professione, qua sibi maxime placebant, in qua primas obtinebant, et se perpetuo resignaturos opinabantur, se dignitate vident à me superatos, hoc est, quod eos assidue torquet, quo continue distrumpuntur, quo dies noctesq; cruciantur. Nam vsq; eo cæci lædendi cupiditate feruntur, vt dum me nimis cupide insectantur, etiam vobis P. C. petulantius, et improbe maledicant. neq; satis aduertant aut cogitent, me sine ope vestra, sine auxilio, sine potestate, nequaquã ad hunc dignitatis gradum ascendere potuisse. quò fit, vt dum mihi procacitate linguæ nocere student, dum in me virus acerbitalis suæ vomunt, eodem tempore vestrum etiam de me iudicium condemnent. quicquid enim est in me dignitatis, si modo quid est, quicquid gloriæ, quicquid honoris, id vobis P. C. totum acceptum penitus fero. vos enim primo me nouum hominem ex umbra, quod aiunt, in solem eduxistis. vos hanc amplissimam atq; honestissimã vtriusq; linguæ profuturã prouinciam, mihi vestra sponte libentissime demandastis. vos mihi filios vestros, atq; vniuersam Mediolanensium iuuentutem erudiendã cõmisistis. vos iidem postea, cum propter bellorum tumultus, intermissis literarũ studiis, ab hac vrbe discessissem, amplificato stipendio me reuocandum anno superiore cen-



fulistis . neq; hoc imperiti homines aduersarii mei considerant , vos  
prudētissimos , & R eipublicæ amantissimos viros , nequaquam ad  
hoc munus me reuocaturos fuisse , nisi probum virum , & tali offi-  
cio dignum iudicauissetis . sed cum nullam in me scelus , nullum  
flagitium , nullam petulantiam , nullum eiusmodi crimen , quo meū  
nomen probabili de causa deferrent , ne fingendō quidem excogita-  
re potuissent , propterea quod ego semper , quo ad facultas mea tu-  
lit , innocentiam , atq; vitæ integritatem amplexus sum , videte quo  
detrahendi studio progressi fuerint . hanc vnā leuem , atq; inanem  
prorsus accusationē ( quemadmodū vos eam pro summa vestra sa-  
pientia atq; prudentia iudicaturos spero ) quod ipse mihi nomen  
immutarim , susceperunt . vt si quo modo fieri posset vestrā à me  
beneuolentiā , quam in me singularem semper ostendistis , vestrosq;  
animos à dignitate mea , cui semper hactenus magnopere fauistis ,  
abalienarēt . in eam enim spem atq; opinionē venerant , fore , vt ista  
sua tam populari actione statim opprimerer , & penè prius à vobis  
condēnarer , quā ab eis reus fierē . nam me propter eorum hostilem  
impetū , adeo timore perterritū existimabant , vt apud vos , quorū  
animos assiduīs criminationibus accendere in me , atq; inflāmare co-  
nati fuerant , pro me ipso dicere , nihil prorsus auderē . Sed hoc eos  
omnino fugit , P . C . magnā vim esse cōscientiæ in utrāq; partem ,  
vt neq; timeant qui nihil cōmiserint , & pœnam semper ante oculos  
versari putent , qui peccarint . hæc igitur vna res innocentiae meae  
fidem cuiusq; vestrum facere debet , quod nulla sceleris consciens-  
tia territus , simul atq; mihi dies dicta est , nihil recusavi , quo mi-  
nus confestim vadimonium obirem , & vestro me iudicio nulla  
interposita mora cōmitterem . Atq; etiam eo magis quoniam multa

esse quæ contra me facerent hoc tempore non ignorabam . primum  
aduersariorū summa gratia , qua plurimum eos in hac ciuitate posse  
non mirum est , cum multos nobiles ciues adulationibus suis , et  
scurrili dicacitate deuinctos consuetudine teneant , apud quos se  
Deos in docendo faciant , et eruditionem , atq; scientiam suam  
extollant , ceteros omnes professores præ se ne pili quidem æstiment .  
qua certe scientiæ opinione multorum gratiam aucupantur . deinde  
summa etiam eorundem audacia , temeritasq; dicendi , qua mortas  
les omnes antecellunt , vt nihil tam incredibile esse videatur , quod  
in quemuis impudenter fingendo dicere non audeant . mihi autem  
( vt quod res est dicam ) mirificus quidam à natura pudor insitus  
est , vt cum in alienis etiam causis initio dicendi commoueri soleam ,  
tum hoc tempore , quo mihi pro me dicendum est , facere non possim ,  
quin , et si recta conscientia fretus , audenti animo in hunc locum  
ascenderim , tamen aliquo timore concutiar . sæpe enim mihi venit  
in mentem subuereri , ne si forte de me , meaq; vitæ rationibus aliqua  
dicere conatus fuero , in arrogantia suspiciōe incidam , quam in hoc  
orationis meæ principio P . C . maxime velim a vobis deprecari .  
vt quæ mihi de me necessario dicenda sunt in hac causa , non ea me  
mea sponte , qui ab omni penitus ostentatione semper alienus fui ,  
sed ab aduersariis coactum , ne turpi iudicio victus abeam , commem  
morare existimetis . nam si pudoris atq; naturæ meæ rationem habe  
re voluero , nihil vt de me libere , nihil magnifice dicere audeam ,  
nullam asserre causam potero , cur me vos dignum existimaueritis ,  
quem ad hoc tam amplum , tamq; honestum publice docendi munus  
eligeretis . huc accedit opinio quædam , quæ iam penitus insedit ,  
atq; inueterauit , in omnium ferè mentibus , non nisi alicuius fraudis

atq;



atq; maliciæ causa solere nomen immutari . qua in te maxime sese  
extulit , atq; exultauit aduersariorum oratio . vsq; adeo , vt hoc vno  
nomine se putent effecisse , vt me quam cupidissime vos P . C .  
dānaturi sitis . Sed ( vt spero ) nunquā improbitate sua , nunquā  
conuictis , et calumniis efficient , vt vos ista prudentia atq; sapien-  
tia , tam leui criminatione ducti , eum , in quem tanta iampridem  
beneficia contulistis , quæ vestra sponte tantis honoribus cōdecorastis ,  
innocentem aduersariū crudelitati iugulandum tradatis . quæ est  
enim ista accusatio , qua se sperant apud vos non omni modo me  
dignitate spoliare , sed etiā si fieri potest , infra mortuos amandare ?  
quam leuis ? quam nugatoria ? quā indigna vestris auribus , vestroq;  
conspēctū ? Quid est quod in me reprehendatis boni accusatores ?  
an me fortasse nefarium aliquod , aut scelestum , aut impiū facinus  
perpetrasse coarguitis ? nihil minus . quid ergo ? tibi , aiunt , nomē  
immutasti . cum enim prius ab omnibus Antonius Maria dicereris ,  
nunc te Marcam Antoniū vocari iubes . en crimen , en accusatio .  
digna vero causa , propter quam tantas isti tragædias excitent , me  
insectentur , exagitent , ex hominū numero eiiciendum atq; extermin-  
andum esse clamitent . nihil enim aliud in me tam longo sermone  
suo , tot nugis aduersarii reprehenderunt , nisi quod vnam in no-  
mine meo syllabam immutarim , et ex Maria , Marcum fecerim .  
Equidem eum esse me gaudeo P . C . in quem cum maxime cu-  
perent aduersarii , ne verisimilem quidem vllam criminationē fingere  
potuerunt . tota enim eorum accusatio ( vt audiuiſtis ) in nominis  
reprehensione versata est . nihil de vita , nihil de moribus , nihil de  
honestatis fama detraxit . quod ab eis nō ideo factū est , quia deesset  
illis maledicendi cupiditas ( semper enim mordaces , et maledici

conuicistores habiti sunt ) sed quia impudenter et aperte mentiri  
veriti sunt , cū nihil quod probabiliter accusare possent , inuenirent .  
Bene habet , iacta sunt optima defensionis meæ fundamēta . neq; enim  
vereor , ne fraudis alicuius aut maliciæ gratia nomen à me quisquā  
immutatū existimet , cum prope aduersariorū confessione vir bonus  
atq; integer iudicatus esse videar . Nam qui accusator , nihil in eius  
vitam dicit , quem accusat , is plane virum probum atq; honestum  
se accusare confitetur . Itaq; mihi facilis ab aduersariis , et expe-  
dita ratio defensionis proposita est , quoniā ( vt ipsi tacendo fatentur )  
omnis abest a me , meisq; moribus , fraudis atq; maliciæ suspicio .  
Sed vt facilius intelligere possitis P . C . quod iam vobis penè  
persuasum esse certum habeo , nihil in hac re maliciose , nihil im-  
probe gestum a me fuisse , date mihi hanc veniā accommodatam huic  
causæ , mihi ad vincendū necessariam , vobis ( quæadmodū spero )  
non molesta , vt apud vos de me ipso , et de superiore vita mea  
paulo liberius aliqua dicam . sic enim et verū ex me audietis , et  
mores meos purgatos , probatosq; esse intelligetis , et de tota huius  
causæ ratione liquidius , et apertius iudicare poteritis . Iulianus  
Comes , homo cum innocentia , atq; integritate vitæ , tum officio ,  
fide , pietate , sui municipii facile princeps , mihi pater fuit P . C .  
qui cum Maioragiū vicum habitaret , atq; ita se comiter liberaliterq;  
gereret , vt vicinis omnibus gratus , et charus haberetur , cognomen à  
loco sortitus est , et Maioragius appellatus . is cum adhuc esset ado-  
lescens , vxorem duxit è comitū nobili familia Magdalenā nomine ,  
lectissimam et honestissimā fæminam . ex qua cum primo tres fis-  
lias suscepisset , tandem etiam me quarto loco suscepit , quem ex  
patris sui nomine , qui mortem iam pridē obierat ( quemadmodū à

plerisq; fieri solet ) Antonium appellauit, ut in filio patrem à mortuis quodāmodo reuocare videretur. hoc enim præcipue nomine semper delectata fuisse familia nostra videtur. nam et apud Maiores nostros, Comites clarissimos, permulti fuerunt, et hoc etiam tempore plures in ea sunt Antonii. cum igitur magna quadam cū sollicitudine atq; cura, quippe quæ vnicū haberet masculū, me mater educaret, et ut superstes essem quotidie vota faceret, boni omnis gratia, quēadmodum ipsa mihi sæpe narrauit, nomini meo Mariam addidit, ut sanctissimū illud diuinæ matris nomen, materna quadā pietate, muliebriq; religione mihi additū, gratiorem ex nomine meo sonum, atq; amabiliorem ad aures ipsius matris apportaret. eam enim sapiissime cōmemini dicere, se Mariæ nomine mirandum in modum solitā esse recreari. Hinc igitur accidit, ut vsq; ab incunabulis, non à matre solum, quæ mihi nomen illud addideret, sed etiā a patre, atq; ab omnibus vicinis Antonius Maria semper vocatus sim. neq; enim vnquā alio nomine me passa est mater, quo ad vixit appellari. neq; pater, cum hoc parui esse momenti iudicaret, in ea re matris voluntati refragari voluit. Ab his initiis profectus, ut primum per ætatem mihi licuit, græcis atq; latinis literis, ad humanitatem informari, statim à parente, qui me quā doctissimū fieri vehementissime cupiebat, quamuis ei non admodum ampla rei familiaris copia suppeteret, erudiendus doctissimo præceptori traditus sum. sed cum aliquos iam in literis progressus facere cepissem, iniuria temporum quæ diu maxime perturbata, atq; tumultuosa fuerunt, effectum est, ut per annos amplius octo, quamuis literarum essem amantiſſimus, nihil tamen in eis operæ, nihil studii potuerim impendere. donec tandem,

cum ab armis discessum esset, et quietiora tempora successissent, à Primo Comite consobрино meo, doctissimo, atq; religiosissimo viro Nouocomum, quæ quondam Romanorū colonia fuit, vbi tunc ipse publice docebat, cum annū iam decimū octauū agerem, magna sanè cū humanitate atq; benevolentia perductus sum. ibi cum aliis quod tempus operam Primo dedissem, qui me studiose, et peramanter erudire contendebat, et ipsius præceptoris iudicio tantum in literis profecissem, vt non solum Græcos et Latinos auctores per me ipsum intelligere, sed alijs etiā interpretari facile possem, Mediolanum in antiquā maiorum meorum patriam veni, viuente adhuc Francisco Sforzia Mediolanensium duce ac principe. Statim Fanniani cum adhuc ignotus in hac vrbē penitus essem, me domum suam receperunt, eaq; comitate, atq; liberalitate erga me semper vsi sunt, vt Lancilloto Fanniano viro summa virtute, fide, religione prædito non minus quam parenti me debere sentiā, et libentissime prædicem. fui apud hunc annos circiter quinq; . quodidem tempore literarum studiis adeo vehementem operam dedi, vt totum illud quinquēnium in labore, atq; animi contentione confecerim, vt me non quies, non remissio, non æqualium studia, non ludi, non conuiuia delectarent. Testis est iste vir grauiſſimus atq; ornatissimus patronus meus, qui mihi adest, de me sollicitus est, meum honorem atq; existimationem tuetur, Lancillotus Fannianus. qui cum in studiis literarum me continenter versari videret, sæpiſſime reprehendere solebat, quòd acquirendæ scientiæ desyderio, propriæ salutis obliuiscerer. Testes sunt omnes qui me norant eo tempore, vt non semel, propter nimis assiduū studium, cum in grauiſſimos morbos incidissem, de vitæ periculo dimicarim.

77  
Erat autem studiis meis ille finis propositus, ut si quo modo fieri posset, amissa iam pridem in hac ciuitate dicendi ratio, et declamandi consuetudo, per me restitueretur. Itaque non tantum ipse frequenter in oratoris declamationibus exercebar, sed nobilissimos etiam ex Mediolanensibus nostris adolescentes incredibili quadam cum oblatione, atque voluptate, propter eorum excellens ingenium, more veterum assidue declamantes audiebam, et eorum dictionem, quantum per me fieri poterat, ad illius diuinæ Ciceronis eloquentiæ modulum, et exemplar informabam. Neque tamen interea cæterarum artium ingenuarum studia prætermittebam. nam eodē tempore studiosissime me ab Arunte Bataleo ingeniosissimo et acutissimo viro in Dialectica exercebar, quæ, quod ait Cicero, quasi contracta, et astricta eloquentia putanda est. et in Mathematicis disciplinis Hieronymo Cardano Philosopho, atque medico peritissimo, et Mathematicorum nostræ tempestatis facile primo, dabam operam. Sed cum propter nouam docendi rationem meam maximus quotidie nobilissimorum adolescentium concursus ad me fieret (nam et vos P. C. et cæteri ciues nostri iam eam de me opinionem conceperatis, ut mihi rectissime committi filios vestros existimaretis) cogitare cæpi longe mihi, et ad famam clarius, et ad erudiendam iuuentutem commodius fore, si publice docendi prouinciâ a Gymnasi nostri præfectis mihi demandari procurassem. quam in spem et cogitationem adductus sum, postquam vir integerrimus et sapientissimus Philippus Saccus, huius publici consilii auctor, et vestri ordinis princeps, pro incredibili eius erga me humanitate atque liberalitate, me ad eam prouinciam petendam inuitauit, suamque suffragationem omnium potentissimam, et probatissimam, quia primus

Gymnasii praefectus erat, ut est etiam hoc tempore, mihi ultro  
perquā amanter obtulit. huius igitur praecipue opera, tum etiam  
studio atq; fauore sapientissimi et ornatissimi viri Francisci Sfronsi  
dati Cardinalis, qui eo tempore Mediolani, cum inter primos Sena-  
tores haberetur, et Caroli Caesaris consiliarius esset, amplissi-  
mum dignitatis gradum obtinebat, magno consensu totius ordinis  
vestri, cum sextum ac vigesimum annum vix dum attigissem, ad  
oratoriam artem publice profitendā electus sum, cum ad Senatum  
de me retulisset vir sanctissimus et spectatissimus Angelus Arcim-  
boldus Nouarię Episcopus, et Praesidis in Senatu vicarius, quē  
ego iampridem mihi patronū adoptarā. quo quidē munere duos  
annos ita persunctus sum, ut (nequid arroganter de me dicam)  
nemo diligentiam aut industriam meam desyderarit. quin potius ita  
noctes et dies in omnium doctrinarum meditatione versabar, ut nō  
tantum propinqui atq; necessarii mei, sed etiā multi ex vobis P.C.  
me sapissime repraehenderent, quod nimium magnos labores, et viri-  
bus meis impares assumere non dubitarē. ardebam enim (ut inges-  
nue fatear) incredibili glorię cupiditate, quam in adolescente nes-  
quaquā esse vituperatione dignam sapientes omnes existimant. nullū  
igitur omnino diem esse patiebar, quin aut publice docerem, aut  
priuate mecum ipse meditarer, sapissime autem eodem die utrunq;  
faciebam. Interim cum apud nos magna esset belli suspicio, quoniā  
ingentes Gallorum copia iam Alpes transcenderant, atq; in Tauris  
nis confederant, omnes publici professores (ut fit in eiusmodi tem-  
poribus) dimissi sunt, et studia literarum intermissa. Quare,  
cum iam biennium in publico versatus fuisset, et meum in hac vrbe  
nomen celebrari cepisset, Mediolano sum profectus, ea tamen



cogitatione atq; mente, ut quoniam non semper bellum fore sperabam, ad eandem publice docendi provinciam instructior atq; eruditior aliquando reuerterer. Ita; cum Ferrariam venissem, et præclare intelligerem quantam huic meæ professioni utilitatem, vel mediocris iuris ciuilibus cognitio posset asferre, propter multos, et in Ciceronis orationibus, et aliis in operibus locos, ex intima iuris prudentia decerptos atq; delibatos, oblatam mihi occasionem repudiare nolui, sed eodem ardore animi, quo reliqua studia cõplecti solitus fueram, etiam ius ciuile sum amplexus. Et Alciato nostro, iuris consultorũ omnium, non tantum nostri temporis, sed etiam veterũ facile principi, qui quatuor annis superioribus Ferrariæ professus est, multum operæ dedi. Sed quia memineram non idcirco me iuris ciuilibus studium amplexum fuisse, ut aliquando de iure consulentibus respondere possem, sed tantum ut facilius latinos auctores intelligerem, ideo summum etiam Philosophum Vincentium Magium eodem tempore audiebam. semper. n. admirabili quodã ad Philosophiam studio concitatus fui, neq; id vnquam studium, cũ ab ineunte ætate complexus fuisset, mihi dimittendũ esse censui. Erant in manibus eo tempore mihi lucubrationes quædam, quas, ut amicis id à me flagitantibus obsequer, in lucem emitte cogitabam. sed incertus animo ferebar, quo modo meum in eis nomen inscriberem. nam in verborũ delectu (quod C. Cæsar eloquentiæ principiũ esse dicebat) adeo diligens, et penè dixerim superstitiosus eram, ut nullum omnino verbum admittendũ mihi esse censerem, quod non apud veteres latinos, atq; probatos auctores inuenissem. id igitur in nomine meo præcipue seruandum esse statuebã, ne cum latinæ linguæ castitatem et elegantiam profiterer,

cliquis mihi barbarum nomen, et apud veteres inauditum, aliquando posset obiiicere. atque eo magis, quod mihi nullo modo conuenire videbatur, ut muliebri nomen cum virili coniungeretur. Quis enim apud antiquos unquam talem nominis coniunctionem vel legit, vel audiuit? legimus quidem à belluis quosdam aliquo euentu cognomina tulisse, ut Asinæ, Scrofæ, Merulæ, dicerentur, sed qui à mulieribus cognomen duxerit neminem omnino legimus. Itaque cum de hac re diu deliberassem, tandem nomen illud Maria, quod (ut supra dixi) fuerat aduentitium et à matre additum, mihi reiciendum esse statui. neque id tamē sine doctissimorum hominum consilio, qui (sicut infra perspicue demonstrabimus) omnino mihi licere confirmabant, non tantum quod mihi displicuisset nomen repudiare, sed etiam quod placuisset vel prænomen, vel cognomen assumere. quæ res effecit (dicā enim nō deriuandi criminis gratia, P. C. sed ut factū est) ut me Marcum Antonium inscribere non dubitarem, assumpto etiam à patre Maioragii cognomine, quod ille (quemadmodum antea docui) sortitus à vico Maioragio fuerat. Primum igitur Ferrariæ, cum oratio quædā mea, decisionesque contra Cælium Calpurnium viginti quinque typis excussæ in lucem venissent, ex earum inscriptione Marcus Antonius Maioragius ab omnibus, qui me norant vocari captus sum. deinde cum quantum mihi satis esse videretur Alciatum audiuissem, et hac in ciuitate restincto iam bellico tumultu, studia literarum instaurari intellexissem, mihi statim reuertendum esse Mediolanum censui, ut intermissum publice docendi munus iterum aggredi tentarem. quod haud ita multo post longe maiori, quā antea stipendio, atque laude vestro sum beneficio consecutus. Hoc aduersariis meis adeo molestū atque graue visum est, ut omni

17.  
vt omni primo ratione, conati sint efficere, ne pristinam dignitatē  
meam recuperarem. deinde cum prater spem illis euenisset, vt vos  
P. C. me tam liberaliter, tamq; benigne reciperetis, nunquam  
apud ciues Mediolanenses de fama, atq; doctrina mea detrahere  
cassarunt, donec tandem cum aliud nihil in me criminis quod aut  
verum esse, aut verisimile videretur, excogitare potuissent, hanc  
immutari nominis actionem suscitauerunt. Hic est exacta vitæ meæ  
cursus, P. C. hæc studiorum meorum ratio, hoc duorum et  
triginta annorum, quibus hætenus vixi, spatiū. in quo nulla fraus,  
nullum notabile vitium, nulla insignis malicia reperitur. illud vnū  
ab aduersariis, in omnem vitam meam studiose cupideq; perquiren-  
tibus, grauius est, repræhensum, quod in nomine meo Mariam in  
Marcum permutarim. quod quidē per se, nullo adiuncto scelere,  
nullo dolo, nulla fraude, quam leue sit, atq; ridiculū, puto vestrū  
penitus ignorare neminem. Intellego P. C. totam aduersariorū  
accusationē tres in partes distributam fuisse, et in huius facti mei  
repræhensione, vnā earum quod contra leges, atq; instituta maiorū,  
alterā quod contra omniū consuetudinē, tertiā quod contra decus atq;  
honestatem sit, esse versatam. quibus singulis ordine mihi respon-  
dendum esse arbitror. vt si forte aliquid oratione sua se perfecisse  
exiimant, hæc illis opinio detrahatur. et iam tandem intelligant,  
aliud esse vere, atq; iuste accusare, quod in hominem innocentem  
minime facere potuerunt, aliud improbe atq; maledice conuiciari,  
quod vnum in tota sua accusatione consecuti sunt. Ac mihi quidē,  
in hac prima parte non admodū laborandū esse video, quoniam et  
si contra leges hoc à me factum aduersarii dixerint, nullam tamen  
penitus neq; diuinā, neq; humanā legem proferre potuerunt, qua

cautum sit ne nomen immutare liceat. sed tantum a quibusdam  
iuriconsultis, se audiuisse dixerunt, a legibus nequis sibi nomen  
mutet, prohiberi. qua in re cum summam atq; ( ut iurisperdentes  
appellant ) crassam ignorantia, tum etiam maxima leuitatem ostens-  
derunt. qui, cum apud tales viros iudicium exerceatur, sperent ex  
eo quod ipsi aliquando vel audierunt, vel ( quod verisimilius est )  
audiuisse finxerunt, non autem ex eo quod re vera lege sanctum inuenitur,  
vos P. C. religiosissimos legum observatores iudicaturos. Quam-  
obrem ita cum eis agam, siquo modo conuenire possim, ut hac de causa  
statim decidatur. si lex una vel civilis, vel diuina reperitur, quae sine  
fraude mutare nomen prohibeat, nihil mihi prosint exempla doctorum ho-  
minum, quae plurima sunt, nihil antiqua consuetudo quae vim legis  
obtinet, nihil denique vita ad hanc usque diem honeste acta. me conse-  
ssim damnate. me quouis supplicio dignum existimate. sed si verba  
tantum inania fundunt accusatores, si tantum ea dicunt, quae non modo non  
confirmant, sed ne confirmare quidem laborant, poteritis ne vos ista virtute,  
ista religione, ista sapientia P. C. animum inducere ut ea credas-  
tis, quae hostili animo, sine ullis testibus, sine legum citatione, sine  
ulla firma probatione, quasi tela venenata contra me iaciunt? noui  
vestram intelligentiam, vestram fidem, nullo modo feretis, ut is ves-  
tro iudicio damnatus abeat, quem non certo aliquo crimine, sed  
tantum calumnia quadam, et falsa iuris interpretatione circumuenire  
aduersarii cupiunt. nam quae tandem sunt istae leges, contra quas a  
me factum fuisse dicitis accusatores? ubi scriptae sunt? ubi repe-  
riuntur? civiles ne sunt, an Canonicae? generales, an municipales?  
equidem cum et ipse diu multumque totum iuris civilis corpus percurrissem,  
et vtriusque iuris peritos consulissem, nullam unquam legem, aut

reperi, aut esse audiui, qua speciatim cautum sit, nequis sibi nomē immutet. quod si vos esse dicitis, cur eam non proferitis? cur non in medium adducitis? legimus quidem Athenis lege cautum fuisse, nequis sibi maternū nomen imponeret, ne ve fœminę familiarū cognomina, vel celebritatum susciperent, sed quid hoc ad causam nostram? nam etiam si nominatim apud alias nationes lege prohibitū hoc esset, non tamen apud nos ideo damnari deberet, nisi nostrę etiā vel ciuiles, vel Pontificiæ leges probiberent. nunc cum nullam, neq; nostram, neq; externam legem inuenire possitis, qua mutatio nominis impediatur, quid est quod hoc nomine me tam impudenter vrsgeatis, vt contra leges à me factū fuisse clamitetis? Sed quid si leges hanc nominis mutationem non modo non prohibent, verum etiā aperte concedunt? quid si, quod vos contra leges esse dicitis, ego luce clarius à legibus ipsis permitti docuero? quid erit causa quo minus improbi calumniatores esse videamini? Quid ergo? vos nullā legē quę prohibeat afferre potuistis, ego vero contra, quę permittat, et concedat, et licere palā testetur, afferre possum. negatis? at iam efficiā, vt etiā inuiti fateamini. Recita Diocletiani atq; Maximiani legē, quā Iustinianus in suo Codice cōprobauit, et perpetuo deinceps ratā esse voluit. Recita. Lex Diocl. et Max.

**SICVT INITIO** nominis, prænominis, cognominis, recognoscendi singulos, impositio libera est priuatis, ita eorum immutatio innocentibus periculosa non est. **M V T A R E** itaq; nomen, vel prænomen, vel cognomē, sine aliqua fraude, licito iure, si liber es, secundū ea quę sape statuta sunt, minime prohiberis, nulli ex hoc præiudicio futuro. Auditis ne, P. C. quā clare, quā aperte, nomen vel prænomen, vel cognomē mutare lex cōcedat?

modo liber sit is qui nomen mutat, et id sine aliqua fraude faciat.  
Quin hoc ostendit non semel esse tractatum, sed saepe statutum fuisse,  
cum ait, **SECUNDUM** ea quae saepe statuta sunt. quam  
autem apposita, quam venusta, quam pulchra similitudine legislator  
vititur: ne fortasse aliquis de hac re dubitare posset, et leuitatis aut  
inconstantiae famam timeret, si nomen sibi mutare voluisset. hoc  
(inquit) est in arbitrio, atque in potestate nostra, ut quandocumque  
nobis placuerit, nomen immutemus. quemadmodum enim initio no-  
minis impositio, cuilibet libera est, et quodcumque voluerit, siue pas-  
ter, siue alius cuius prae nomen imponere potest, ita quilibet cum  
adoleuerit, si forte sibi nomen vel à parentibus, vel ab aliis impos-  
situm, minime placuerit, sine ullo periculo, modo sit innocens,  
potest illud immutare. Quid hac sententia clarius? quid mani-  
festius? quis huius legis verba potest aliter interpretari? quis in aliud  
sensum detorquere? quis exceptione aliqua contrahere? cum ipsi  
legislatores unam tantum eam exceptionem addant, extra quam si quis  
fraudis gratia faciat. quo in loco Doctores, hoc fraudandi gratia  
fieri sentiunt, cum sigillatim, et in una tantum, aut altera re, no-  
men mutatur, non autem cum generatim, atque in rebus omnibus.  
cum igitur hanc unam fraudis causam legislatores excipiant, nemini  
dubium esse potest, quin alias omnes admittant. unde Baldus legum  
interpret acutissimus, totius legis huius summam ita paucis explicat:  
**MUTATIO NOMINIS** non fraudulosa libero  
homini est permissa. quod etiam Alciatus noster quarto Dispun-  
ctionum suarum libro comprobatur. quae cum in memoriam reuoco,  
nullum causae meae patronum desydere. nam etiam si nihil de hac re  
lege cautum fuisset, tamen id mihi licere contenderem. quae enim



17  
legibus minime prohibentur, omnibus ea concedi videntur. nunc cum lex ipsa palam testetur, et aperte clamet, licere cuilibet homini libero mutare nomen, quid est cur ego dubitare debeam; quin omnium sententiis victor in hoc iudicio discessurus sim? nam quod quidam huius legis interpretes ita sentiunt, viri boni esse officium, ad effugendam fraudis suspicionem, vniuersæ multitudini nunciare se pristinum nomen immutare velle, vel edicto proposito se in futurum alio nomine usurum patefacere, id tametsi non legis præceptum sit, sed tantum ipsorum interpretum consilium, tamen a me diligenter obseruatum est, qui non prius me Marcum Antonium Maioragium appellauit, quam essent scripta mea typis excussa, et passim peruulgata. quibus intelligere poterant omnes, eo me postea nomine semper uti velle. quamobrem aut lex damnanda est, quæ nomen mutare permittit, aut ego lege sum absoluendus. Sed quis tam audax, tam temerarius, tam furiosus esse potest, qui legem eam imprebendam esse censeat, quæ iam annis mille atque amplius, ex quo fuit a Iustiniano comprobata semper valuit? quam nemo vnquam reprehendere ausus est? cuius auctoritate freti, multi doctissimi homines nomina commutarunt? cui nihil vnquam, ex quo fuit edita, neque abrogatum, neque derogatum fuit? quæ tam clara, tam aperta, tam perspicua est, ut cum aliæ plerumque leges, varios sensus admittere posse videantur, hæc nullum alium sensum, nullam interpretationem prorsus admittat? quod si lex valet, si firma est, si rata, quis non intelligit à me legitime nomen immutari potuisse? quod enim ex lege fit, id etiam iuste fieri existimant, alioquin a iusticia leges discreparent. quod ne dictu quidem fas est. ergo sequitur ut hoc à me iuste factum sit. ridet accusator meus Fabius Lupus, maximus

( vt ipse sibi videtur ) veterator , orationē se sperat inuenisse , quā me differat . nam reliqui minus aliquanto mihi sunt infensi . hic vnus . virget , instat , quiescere non patitur , sanguinem meū sitit , me viuū . exorberē concupiscit , immiti quodā atq; effrato animo tanquā ictus aper in me ruit . audiuit ( vt opinor ) nominis mutationē , iure ciuili cuius homini libero permissam esse . quare multis exemplis et argu-  
mentis conatus est ostendere , nō omnia quæ iure ciuili permittuntur , homini Christiano esse concessa , quoniam multis in rebus Pontificiæ leges a ciuilibus multū discrepent . quā in parte plurimum eius exul-  
tauit oratio , atq; ita sese iactauit et extulit , vt vocem illam suam effæminatā atq; lugubrem ea ratione se vendibiliorem posse facere speraret . perinde quasi noua quædam atq; ante hunc diem inaudita diceret , quæ neq; vos P . C . neq; quisquā alius literarum studio-  
sus potuerit vnquam aduertere . Quid ais bone accusator ? quā in re legem a me citatam damnas ? quid habes contra illam dicere ? quid est , quod eam improbandam censeas ? multa sunt ( inquit ) iure ciuili permissa , quæ tamen à diuinis legibus penitus abhorrent . audio . Sed quæ tandem ista sunt ? potes ne inter ea nominis muta-  
tionem connumerare ? nihil minus . quid ergo ? permittunt ( inquit ) leges esse in ciuitatibus Lupanaria . permittunt fœnora centesimarū , trientum , besium , et semissium . permittunt adulterum cum filia nupta deprehensum interfici . nemo tamē vir bonus , scortari , fœne-  
rari , occidere , iustum esse dicet . quid præterea ? permittunt leges oppressos ære alieno pauperes in carcere emori . permittunt vt qui uxorem nō habet , ei concubinā habere liceat . et alia nonnulla quæ nemo vir probus laudare possit . sunt ista vera , quis negat ? sed quid ad quæstionē nostram ? habet ne similitudinē aliquā mutatio nominis

18  
cum meretricia consuetudine, cum fœnore, cum cæde, cū pellicatuꝛ  
quis tam rerum ignarus, tam amens, tam stupidus est, quin intelligat  
hæc, tota ( quod aiunt ) diametro discrepare & iam videlicet, te aus-  
tore ex iudice, si puella sibi nomen immutarit, in tam graue crimē  
incidet, quam si concubina alicuius, aut meretrix facta fuerit. si quis  
religionis gratia nouū sibi nomen assumpserit, æque peccabit ac si fœ-  
nerator, aut homicida factus fuerit. quis hæc tam absurda, tam à  
cōmuni sensu aliena, tam à ratione abhorrentia sine stomacho potest  
audire? quis non videt argumentorum inopia, te illa conquirere,  
quæ non modo tuam accusationem nō adiuuent, sed etiam plurimū  
infirmant? quæ nihil aliud quam hostilem atq; iniquū animum tuum  
ostendant? speras ne talibus viris iudicantibus istam similitudinem  
tuam te probaturum? poterunt ne isti iudicare, tam grauitè ab eo  
peccari, qui sibi nomen mutet, quam ab eo, qui scortetur? fœ-  
neretur? occidat? concubinam habeat? vide ne sint ista tua de-  
creta Stoicorum, qui non minus eum peccare censebant, qui gallū  
gallinaceum, quam qui hominem occidisset, qui caulem alterius  
horti fregisset, quā qui Deorum immortalīū fana spoliasset. Salue  
noue stoice, Zenone temperantior, Catone seuerior. Sed tamen  
quæso te nisi molestum est, priusquā ista tua tam forti ratione con-  
demnor, vt mihi pauca quædā respondeas. cupio enim ex te intelli-  
gere, vtrum diuinis atq; Pontificiis legibus, scortationes, fœnora,  
cades, crudelitas, pellicatus, prohibeantur, nec ne? quid hoc  
( inquis ) ad rem? nihil sed tamen scio te responsurū id quod nullo  
modo negare potes, talia omnia nominatim esse prohibita. Sed quid  
de mutatione nominis eodē ne modo cautū est? Prò summe Deus,  
quantā hominibꝫ cæcitatem improbitas atq; nocendi studiū inducit.

nescit omnino quid respondeat . quid fingat extemplo non habet . videt enim apertissime , quæ modo cōmemorata fuerunt , a diuinis legibus esse reprobata , nominatimq; de singulis cautum esse , ne cuius quā scortari liceat , ne liceat fœnerari , atq; ita de cæteris . cum tamē interim nusquā aut in sacris literis , aut in Pontificio iure , aut in iis quæ sanctissimi homines ediderunt operibus , nomen mutare prohibitum sit . hac enim diligentia sapientissimi viri Maiores nostri qui ius illud condiderunt , quod vulgo Canonicū vocant , vsi sunt , vt non tollere ius ciuile , sed emendare quodammodo viderentur . itaq; factum est , vt quæcunq; viderent à fide persuasioneq; christiana nihil abhorrere , ea firma , atq; rata omnia esse voluerint , quæ vero vel tantillum a diuina lege dissentire intelligerent , ea vel prohibenda penitus , vel corrigenda saltem esse censuerint . Scortationes igitur et fœnora , et pellicatum , et id genus cætera , quæ semper annexam turpitudinem habent , quamuis ciuili iure concederentur , procul tamen à christianis moribus abesse oportere statuerunt . nominis autem mutationem quæ nihil honestati , bonisq; moribus obesse possit , non modo non prohibuerunt , sed etiam cuius liberam permisierunt . Quare tantum abest , vt mutare nomen christiani damnandū esse censeant , vt etiam nescio quid religionis habere iudicent , vt cum vitæ rationibus etiā nomen mutare frequentissime soleant . vt nullā vestalem virginem fieri , nullū monachū , nullū Pontificem patiantur , nisi nomine prius immutato . cum igitur apertissime constet nominis mutationem et a ciuili iure , et a diuinis legibus cuilibet esse concessam , quid est quod amplius aduersarii mei tam indocte , tamq; imperite clamitent , hoc à me contra leges esse factum ? dixi de legibus quæ mihi satis huic causæ facere videbantur , sequitur vt quod

Secundo

secundo loco mihi obiecerunt aduersarii, contra omniū consuetudinē hoc à me factum esse, refellamus. qua in re mihi quidem magnam præferre rerum humanarum ignorantiam atq; imperitiā videntur, cum, quod et antiquis illis temporibus, quibus maxime iusticia sapientiaq; florebat, et patrum nostrorum memoria frequentissime fieri solebat, et hac etiam nostra tempestate sapissime fit ab eruditis viris, id quasi nouū et inusitatum, et ante hunc diem inauditum in me repræhendant. Nam per Deum immortalem, quanam est ista consuetudo vestra, quam mihi opponitis accusatores et doctorum ne an imperitorū hominū et si imperitorum, vno vobis in hac parte verbo satisfaciam, literato viro quid imperita multitudo sequi soleat non admodū esse curandū. quid enim absurdius, aut ineptius dici potest, quam cū de aliqua re disceptatur, quærere quid baiuli atq; operarii, non quid homines doctissimi de illa senserint et non est enim consilium in vulgo, non ratio, non discrimen, nō diligentia, sed omnia præsentis sensu iudicat, parum admodū sentiens præteritum aut futurū. putatq; nihil omnino recte fieri, nisi quod vulgare omniū consuetudinem sequitur. a parentum enim suorum vestigiis, etiam si plerunq; pessima sint, vel vnguē latum discedere scelus existimat. Itaq; summa quadā atq; immensa religione, vel auili potius superstitione, iampridem inueteratos apud se mores, quantumvis inepti sint, atq; ridiculi, sibi seruandos esse censet. quod si quis non modo aliter faciat, sed etiam contra sentiat, eum statim improbum, nefarium, factiosum appellat. si doctorum hominum consuetudinē intelligitis, recte quidem vos consuetudinis verbum interpretari iudicabo, sed imperitiā vestram ridebo. neq; enim ex eo quod plures faciunt, consuetudo vim debet accipere. quod si fiat, omnia recte atq; honeste vi-

uendi præcepta subuertentur . quotus enim quisq; est , qui studiis  
honestis , & pertinentibus ad bene beateq; viuendū delectetur : quan-  
to plures & hoc tempore sunt , & semper fuerunt , quibus turpia ,  
quā quibus honesta placeant : quā multa sunt in populari vita , vulgū  
consuetudine ridicula , inepta , superstitiosa , vana , sordida , quæ  
siquis reiiciat , & contemnat , eum ne aliquid contra hominū consue-  
tudinem moliri , aut facere dicetis : non existimo vos eo dementia ,  
atq; insanie peruenisse . Quid igitur id est quod consuetudinem  
appellatis : equidē ita video Maioribus nostris , eruditissimis , atq;  
sapientissimis viris placuisse , vt eam consuetudinē quam sequi , atq;  
obseruare debeamus , non quemlibet inueteratū morem aut vsum esse  
censerent , sed eum qui neq; ab honestate , neq; a legibus abhorreret ,  
quem omniū voluntate sine scripto vetustas comprobasset , qui deniq;  
naturam optimā ducem sequi videretur . Itaq; Fabius vir vt doctis-  
simus , ita etiā sanctissimus ego ( inquit ) consuetudinē sermonis vo-  
cabo cōsensum eruditorū , sicut viuendi , consensum bonorū . quibus  
ex verbis intelligi potest , duplicem esse laudabilem consuetudinem ,  
alteram sermonis , alteram vitæ . quemadmodū etiam omnis nostra  
laus atq; gloria , cum ab eleganti doctoque sermone , tum a rebus præ-  
clare gestis provenire solet , sed vitæ consuetudinem a bonis atq;  
honestis hominibus esse petendā . talis enim quisq; fieri solet , quales  
ii sunt quorū consuetudine delectatur . sermonis autem ab eruditis  
atq; doctis , nam hi soli apte , distincte , atq; ornate dicendi rationē  
tradere possunt . quid ergo : contra quam ex his duabus me consue-  
tudinem fecisse arguitis accusatores , vitæ ne , an sermonis : de vitæ  
meæ consuetudine nihil dico amplius , quoniam satis ostendi nihil  
cōtradicientibus vobis , me bonorum hominū semper studiosum atq;



138  
imitatorem fuisse, neque unquam tale aliquod flagitium admisisse, de  
quo merito condemnari possem. Restat ut de sermonis consuetu-  
dine videamus. Pro Dii immortales quantum in hac parte volupta-  
tis, quantum oblectationis, ex aduersariorum oratione percepi P. C.  
cum eos tam inepte, tam confuse, tam impolite loqui audire. vix  
me hercule risum continere poteram, cum in mentem mihi veniret eorum  
arrogantia, qui cum se solos non tantum in hac ciuitate, sed in toto  
penè terrarum orbe scire putent, cum se bonarum literarum profes-  
sores et inscribant, et appellent, cum dicendi præcepta quotidie dis-  
cipulis suis inculcent, et optimi Rhetores haberi velint, in iudicio  
publico, coram omnium doctissimo Senatu Mediolanensi, coram vo-  
bis denique P. C. qui propter singularem prudentiam, et summam  
eruditionem in hoc consilium publicum delecti estis, tantam dicendi  
imperitiam, tantas verborum sordes, tam inquinatum locutionis modum  
atque ut vno verbo dicam tantam barbariem ostentarint. at in qua causa  
quam annum integrum atque amplius commentati sunt. nam anno su-  
periore, cum Ferraria Mediolanum redissem, et a vobis in pristinum  
locum restitutus fuissem, eos intellexi iam actionem hanc in me  
præparare. Sed audebunt ne isti mihi sermonis consuetudinem  
obticere? Te Fabi Lupe appello, qui mihi præter ceteros accusa-  
tores, visus es in hac parte ceruiculam iactare, tuorumque lugubri vocis  
eiulatu, tantum audientium aures offendisse, ut cum nullum gar-  
riendi finem faceres, te tandem Senatus princeps tacere iusserit,  
atque aliis etiam dicendi locum relinquere, vtram tandem existimas  
propius ad illam veterum latinorum, et Tullianam dicendi consue-  
tudinem, meam ne dictionem, an tuam accedere? tametsi nihil  
mihi arrogo, quippe qui longissimo sane me videam intervallo

Ciceronis vestigia sequi, nō tamen esse te tam impudentē existimo, qui præsētibz his talibz viris, sordidā istam locutionē tuam ausdeas huic, qualiscunq; est, orationi meā præponere. cum præsertim ego tot vigiliis & laboribus, hanc mihi modicā dicendi facultatē compararim, tibi vero, quod satis constat, non oleum, sed vinū, non lucerna, sed tenebræ, non vigiliæ, sed cubile, semper cordi fuerit. atq; (vt Poetice loquar tibi magis Venus, quā Musæ, Bacchus, quā Apollo, Genius, quā Minerva perpetuo placuerit. hinc igitur accidit, vt ab eruditorū consuetudine sermo tuus prorsus abhorreat. meus autē ( nisi me fortasse, meaq; , plusquā satis est amo ) se talem audientibus offerat, vt omnes facile iudicare possint, in bonis auctōribz me diu diligenterq; esse versatum. nam vsq; eo polita, atq; ornata dictionis ab ineunte ætate semper studiosus fui, vt etiam nomen meū, quia nescio quid Barbarum præ se ferre videbatur, immutarem. Hic te volumus ( inquit accusatores, hoc defende, nō esse factū præter omniū consuetudinē. immo vero nihil mihi facilius est, quā apertis rationibz ostendere, nō tantū hoc non esse contra consuetudinē, sed etiam ex cōmuni consuetudine factum esse. modo mihi id concedatis, quod nō nisi impudētissime negare potes sis, omne nominū atq; sermonis arbitrium apud eruditos homines, & esse debere, & semper fuisse, vt quicquid ipsi cōmuniter sentiant, id ab aliis ratum haberi debeat. neq; enim naturalia nomina sunt, vt nō immutari data occasione facile possint, sed tantum rerum notæ quædā sunt, vt nō difficulter eruditi videre possint, quod cuiq; rei magis nomen conueniat. vnde Pythagoras maximam eius fuisse doctrinā, atq; sapientiam dicebat, qui nomina primo rebus imposuit. nam quāuis plurima reperiantur nomina, quæ rerū

vim et naturam exprimant ( ut apud Platonē in Cratylo Socrates  
copiose disputat ) omnia tamen ab eruditorum hominum institutione  
profecta sunt . Quod cum ita sit nemini dubium esse potest ,  
quin eruditorū consensus ; cōmunis in nominum impositione consue-  
tudo vocanda sit . Quæramus igitur primo recentiorū , atq; doctissi-  
morum hominū exempla , deinde etiam veterum , qui vel sibi ipsi  
nomen immutarunt , vel ab aliis oblatū libenter accepuerunt , ut tandē  
aliquando desinant aduersarii ea de re me accusare , quæ nunquā ab  
aliquo sapiente fuit improbata . Quis hoc nostro tempore bonarū  
literarum professor Egnatio Veneto clarior est ? qui iampridē Ve-  
netiis vtranzq; linguam ita profitetur , ut ei plurimum bonæ literæ  
debeant . qui non aliter atq; Cato ille Censorius , cum annum iam  
octogesimū excesserit , tamen in solitis suis laboribus , atq; in publico  
docendi munere perseverat : hunc igitur in iuuentute sibi nomen im-  
mutasse constat , neq; tamen ea de causa quisquā eum vnquam accus-  
sandum , aut reprobandum esse censuit . Et quæ mutatio fuit illa  
Dii boni : quam longe petita , quam à priore nomine diuersa :  
cum enim antea Baptista de Cipellis diceretur , postea factus est  
Egnatius . quantopere fremerent aduersarii mei , quā sese iactarent ,  
quam me statim exterminare se posse confiderent , si talem in nomine  
meo mutationem inuenissent ? qui propter vnā immutatā in eo syllabam ,  
tantas turbas cōmouent , et in me tam tragice vociferantur .  
Quid de Fabio Vigili , viro non tantum doctissimo , sed etiam  
sanctissimo , dicam : qui propter egregias virtutes suas dignus est  
habitus , cui Spoletinus Episcopatus a Paulo tertio Pontifice Ma-  
ximo demandaretur : is enim cū antea Fabianus Vetulæ vocaretur ,  
postea se Fabium Vigile vocari iussit . quo nomine nunc etiam ab

omnibus appellatur . ecquid ea de causa dignitatis amisit . ecquid ideo minus Pontifici gratus fuit . immo vero tanto postea gravior euasit , quanto sibi gratius nomē adoptarat . Iam vero Pierius Valerianus , vir in primis eruditus , et in summo precio atq; honore propter sacerdotii dignitatē , et non vulgare doctrinā habitus , Petrus Valerii prius dicebatur . Quid Phædrus ille volaterranus , tam clarus orator , cuius omnes actionē mirabantur , quem Sadoletus in suo de Philosophia libro contra Philosophiam ipsam disputantem inducit , annon antea Thomas Ingeramius dicebatur . ecquis vnquā tantam in eo duorū nominum mutationē vel leui reprehensione dignam censuit . Quid Politianus vir ita facundus , et oratione politus , vt non sine causa , nomen illud asciuisse sibi videatur , annon Angelus antea de monte Pulciano fuit . Quid Domitius Calderinus , nōne sibi nomen finxit , cum antea Dominicus de Caldariis vocaretur . Quid Ianus Aulus Parrhasius , nōne prius Ioannes Paulus de Parrisiis dicebatur . doceant igitur aduersarii si possunt , aut hæc quæ proferimus exempla , quæq; dicturi sumus , vera non esse , aut eorū aliquē qui sine fraude nomen immutarint , qui sane quā plurimi fuerunt , ea de causa vocatum in iudicium fuisse . quod si probare poterint , quo minus secundū eos litem detis , et contra me sententiā feratis , P . C . non recuso . Sed quid cesso doctissimi , atq; eloquentissimi viri exemplum , in mediū afferre , quem ego libenter auctorem secutus sum . qui ( vt arbitror ) eadem de causa , qua ego , cum idem nomen haberet , repudiato vetere nouū assumpsit . Marcus Antonius Flaminius , qui sua elegantia dicendiq; venustate , doctorum omnium in se ora conuertit , cum puer esset , et Bononiæ sub patre suo ludī magistro literis operam daret , vt a multis fide dignis

viris accepimus, Antonius Maria dicebatur. hic postea cum plurimum in literis profecisset, et Romam Bononia transmigrasset, se Marcum Antonium appellavit. huius pater, Ioannes Antonius Flaminius, cum esset Imolæ natus, admodum obscuro loco, neque ullum familiae nomen clarum haberet, in Flaminiorum gentem insinuavit, et se Flaminium appellavit. quæ res illi nunquam dedecori, sed magno semper honori fuit. et merito. nam si Romani prudentissimi viri, candidatis suis (quemadmodum in historiis habemus) quo tempore præhensare volebant, magistratusque petere, sibi nomina patriciorum et nobilissimarum familiarum adoptare concedebant, quo gratiores essent apud populum, et facilius quem peterent magistratum assequerentur, quæ in re de Reip. administratione, atque salute agebatur, quanto magis nobis Musarum candidatis concedendum est, nomen illud quod elegantius visum fuerit assumere? cum præsertim hac in re, nemo damnum à nobis possit, aut detrimentum accipere? quare Lepide Pomponius Lætus, vir summa eruditione, atque dicendi lepore clarus, cum a Paulo Secundo Pontifice Maximo, cuius consuetudine familiariter utebatur, molli quodammodo brachio repræhenderetur, quod mutato nomine, cum antea Bernardinus diceretur, se Pomponium Lætum vocari iuberet, quid hoc (inquit) ad te Pontifex Maxime? an si me Fœniculum appellari voluisssem, id repræhenderes? risit ad hanc responsionem Pontifex, neque illum impedendum esse censuit, quo minus suo sibi arbitrio nomen adoptaret. Cum igitur prope immunerabilia sint eruditissimorum hominum exempla, qui suo arbitratu nova sibi nomina finxerint, quos nemo tamen unquam, non solum in iudicium vocavit, sed ne gravius quidè repræhendit, nequeo satis aduersariorum meorum inscitiam admirari,

qui hæc tam clara, tam aperta, tam vsitata, pro nefario scelere mihi obii-  
ciant. cum præsertim hoc non tantum à literatis hominibus, sed  
etiam a plerisq; aliis quotidie fiat. quis enim nescit eos, quos Mona-  
chos aut cucullatos appellamus, cum in religiosorum conuentus, et  
cenobia transmigrant, vetera nomina deponere, et alia noua sumere?  
quod si mutatio nominis esset improbanda, quis eo tempore quo ma-  
xime religioni se deuouet, aut sibi nouū nomen eligeret, aut à reli-  
gionis antistitiibus pristinū nomen suum immutari pateretur? hoc idē  
puellæ faciunt, quæ more vestaliū virginū, perpetuam Deo casti-  
tatem vouentes, monasteria (quæ vocant) ingrediuntur. nam aut  
ipsæ sibi permissu præsidum nouū nomen eligunt, vetus repudiant,  
aut a præsidibus oblatum recipiunt. Quid Pontifices Maximi?  
sunt ne eo nomine contenti, quo die suo lustrico fuerant insigniti?  
minime vero, sed cum Pontificatū ineunt, aliud confestim sibi nomē  
assumunt. Et quisquam adhuc dubitabit, quin accusatores isti me  
aperte calumnientur, et falso dictitent, contra omnium consuetudinē  
hoc à me factum fuisse? cum et plerisq; literati viri, et quicunq;  
religionis gratia nouas viuendirationes ineunt, nouosq; sibi amictus  
induunt, et ipsi deniq; Pontifices, a quibus tota religio nostra fulciri  
creditur, sibi nomen immutare soleant? profecto non hæc tam per-  
spicua, tamq; peruulgata negarent, nisi eos vel malicia, vel inuidia  
cæcos omnino redderet. Nam etiam in eo me non sane leuiter accu-  
sant, quod gentis, atq; familiæ meæ nomē dimiserim, et Maiora-  
ragii cognomen assumpserim. tamq; insipientes atq; ignari rerum esse  
videntur, vt quod ego modestiæ gratia feci, putent arroganter à me  
factū. existimant enim Maioragiū à me factum esse cognomē à ma-  
iore, quorū opinio quā ridicula sit, atq; inepta, vel puto perspicuū est.

Sed



171  
Sed ut facilius consilii mei rationem intelligatis P. C. breuiter  
vnde familia nostra duxerit originem explicabo. Quo tempore  
Longobardorum Rex Desiderius, apud Maiores nostros, rerum  
in Cisalpina Gallia potiebatur, tres fuerunt fratres ipsius Regis pro-  
pinqui atque necessarii, quippe qui ex eius sorore nati fuerant, quorum  
primus Amphortius, alter Fusius, tertius Catus vocabatur. hos  
ipse Rex, non tantum quia propinqui erant, sed etiam quia singu-  
lares eorum virtutes, et in bello, et in pace fuerat expertus, ma-  
ximis honoribus prosecutus est. et prater alias dignitates, et egre-  
gia munera, quibus eos affecit, totum etiam tractum illum, qui  
inter Nouocomum, et Medetiam, et Leucum extenditur, et  
sursum versus usque ad Larii diuortia, largitus eis est. quo tractu  
continetur ea quae Plebs Incini dicitur, et tota Brigantii montis re-  
gio; vino clarissima, totaque vallis Asinia, atque etiam aliae nonnullae  
regiones. In quibus locis confidentes tres illi fratres, honoris gratia  
sunt ab ipso Rege Comites appellati. quod nomen non ita pridem  
eo tempore ceperat esse dignitatis, cum apud antiquos Latinos in ea  
significatione nusquam reperiatur. hinc igitur factum est, ut horum  
fratrum posterii, sint comites nominati. vnde postea familia  
Comitum longo tempore Mediolani floruit, atque etiam hodie multis  
nobilissimis et eruditissimis viris floret. Sed ut ad tres illos fratres  
reuertar, Amphortius qui ex illis natu maximus erat, Maioragium  
vicum extruxit, atque in eo turrim, cuius adhuc in domo mea paterna,  
post septingentos atque amplius annos, quaedam extant vestigia, atque  
fundamenta. hic nostri generis auctor fuit, atque ab illo Comites  
Amphortii maiores mei dicti fuerunt. Fusius autem et Catus nonnul-  
los alios vicos cum turribus aedificauerunt. vnde etiam hoc nostro tempore,

multi sunt in eis locis, licet obscuri, atq; ignobiles, qui Comites Fusi, et Comites Cati vocentur. ab his maioribus orta Comitū familia; plures habuit clares, atq; illustres viros, qui (vt arbitror) nominis ambiguitatem euitantes, ne re vera Comites esse crederentur, non se Comites, sed de Comitibus inscribebant. verum cum hoc locutionis genus à consuetudine latini sermonis abhorreret, primo patruus meus vir eruditissimus, qui permultos annos Mediolani magna cū gloria publice docuit, cū elegantiae sermonis admodū studiosus esset, nō amplius se de Comitibus, sed Petrū Comitē cepit inscribere. vidi ego nō nullas eius lucubrationes sanè perquā eruditas cum hac inscriptione, Petrus Comes. hunc imitati sunt eius fratres, Iacobus, et Aluysius, atq; etiam pater meus Iulianus, qui horum sororem Magdalenam, in matrimonio habebat, nam hi omnes se perpetuo Comites inscripserunt. quos deinde subsecuti, Primus, et Antonius, Aluysii filii, consobrini mei, pergunt etiā nunc eodē se modo inscribere. Verum ego cum hoc nomen Comititis ambiguū esse viderem, et ab omnibus, quibus familia nostra nota non est, pro dignitate capi intelligerē, statui mihi esse dimittendū. cum praesertim Maioragii cognomentū haberē adhuc à patre hereditarium. ne id fortasse mihi aliquando accideret, quod Primo Comiti, consobrino meo contigit. qui cum in Germaniam ea de causa profectus fuisset, vt Erasmi consuetudine per aliquod tēpus frueretur, priusq; ipsum Erasmi conueniret, ad eum literas dedit, quibus aduentus sui causam declarabat, quarū in extrema parte nomen suum (vt fit) ita inscripserat: tui studiosissimus, Primus Comes Mediolanensis. hanc cum Erasmus inscriptionem vidisset, credidit statim magnum alique adeste principem, sui visendi gratia. Quare licet admo-

17  
dum senex et infirmus esset, tamen quo studio, quoq; apparatu  
potuit, obuiam consobrino meo, longe processit. sed postquam  
homunculū vnum, nullo comitatu, nullo seruorū grege. stipatum,  
et literatum quidem, sed nullo elegantiori cultu vestitum inuenit,  
errorem suum ridere iucunde capit. et tamen eum multo gratiorem  
aduenisse, quā si magnus princeps fuisset, multis audientibus testat-  
us est. itaq; ipsum benigne, sicuti dignus erat excepit. quin eadem  
ratione deceptus aliquando fuit in nomine meo, vir insignis ac liter-  
atus Sebastianus Gryphius. cum enim ad eum literas dedissem, et  
me Comitē inscripsissem, ille mihi tanquam alicui principi respon-  
dit, et clarissimum Comitē non semel appellauit. Itaq; cum hoc  
aduertissem, et exemplo doctissimorum hominū me familiæ nomen  
prætermittere posse intelligerē, statui nomē illud Comititis, omnino  
mihi dimittendum esse. sunt enim innumerabiles pene literati viri,  
qui relicto familiæ nomine, vel à regione, vel à loco ubi nati sunt,  
sibi cognomen assumpserunt. vt Erasmus pene diuino vir ingenio,  
qui de re literaria plurimū bene meritus est, a vico ubi natus erat,  
se Roterodamū appellauit. vt Antonius Nebrisenſis, qui primus  
apud hispanos literas illustrauit. ita Petrus Marsus, Antonius  
Volsus, Rhaphael Volaterranus, Antonius Minturnus, infi-  
nitiq; alii. quod aduersariis meis nouū videri mirū est, in hac præfer-  
tim ciuitate, in qua plurimæ familiæ nomē à vicis, vnde traxerunt ori-  
ginē seruant. vnde enim Andreas Alciatus iuriconsultorū omniū  
princeps, nomē habet? annō ab Alciato vico, q nō amplius quinq; mil-  
lia passuū, à Maioragio distat? atqui hoc ego nomine nō nunquā glo-  
riari soleo, quod mihi fortuna dederit, vt incunabula generis, ex eodē  
pene loco, cū Alciato traxerim. quid Fannianorū nobilissima familia?

quid Lampugnanorū ? quid Castillioneorū ? quid Cusanorū ? quid  
Legnanorū ? quid plurium aliarū , quæ Mediolani clarissimæ sunt ?  
annō omnes à vicis , qui in agro Mediolanensi extant etiā omnes hoc  
tempore nomen habent ? Quis non igitur vehementer admiretur ,  
tam insipientes atq; amentes istos accusatores esse , vt se vobis hoc  
persuadere posse sperarent , contra omniū consuetudinē esse factū ,  
qui tanta estis prudentia , sapientiāq; præditi , vt non tantū quid in  
cōmuni consuetudine sit , verū etiam quid omnino fieri oporteat , aut  
liceat , omniū optime cognoscatis ? hocine igitur vobis præter om-  
nium consuetudinem videri potest ? quod à tot eruditis viris , à tot  
religiosis , à tot summis Pontificibus , à tot clarissimis familiis , fre-  
quentissime fieri consuevit ? At dicet aliquis hoc esse nouū , et à ve-  
teribus minime factitatū . quod et si concedā , nō tamen ideo vincēt  
aduersarii , contra consuetudinē esse factū . quoniā ex quo tempore  
nostra persuasio fidesq; Christiana vigere cæpit , etiā hæc mutandi  
nominis consuetudo cum ea inualuit . nam et Christus auctor atq;  
parens salutis nostræ , nōnullis ex discipulis suis nomina mutauit , et  
postquā ipse in æternam domū suā concessit , eius legati ( quos apo-  
stolos vocamus ) eis fere omnibus , quos Christo , et sacris eius ini-  
tiassent , nomina mutabant . quare tam prisca , tam antiqua , tam  
vetus hæc consuetudo videri potest , quā persuasio nostra , quam  
fides Christiana . Sed quid dissimulare opus est ? quasi vero mihi  
probare difficile sit , mutandorū nominū vetustissimā esse consuetu-  
dinem , quēadmodum et ex sacris hebreorū libris , et ex historiis  
intelligi facile potest , nisi mihi satis esset ad victoriam ostendere ,  
nequaquā a Christianorum moribus hanc mutandi nominis rationem  
alienam esse . Sed tamen illud non prætermittā , multis de causis

17  
apud veteres illos Romanos diligentissimos nominum observatores ,  
pristinum immutari nomē consu uisse . primo enim quoties peregrinus  
aliquis ciuitate donabatur, & ciuis Romanus fiebat , is arbitratu  
suo nomen Romanū quod sibi magis placuisset , eligebat . sic Ar-  
chias Poeta posteaq; ciuis Romanus factus fuit , Aulus Licinius  
dictus est sic Antipater historicus , ciuitate donatus . L . Caelii no-  
men assumpsit sic innumerabiles alii , ius Romanæ ciuitatis adepti ,  
quæ grata sibi fuissent , nomina capiebant . deinde etiam illā apud  
Romanos fuisse consuetudinē obseruauimus , ut cum plebeius ali-  
quis equestrem dignitatē adipisceretur , nouū sibi , repudiato vetere  
nomen adoptaret . quin aperte Plutarchus ostendit , apud Romanos  
licuisse cuilibet volenti mutare nomē , cum de Cicerone sic in eius  
uita scribat . cum primas dignitates Reipublicæ capisset attingere ,  
& a beneuolis suis crederetur , id nomen aut omnino vitaturus , aut  
in aliud cōmutaturus , iuuenili quadam audacia dixisse traditur , se  
certaturū splendidius Scauris , atq; Catulis , Ciceronis nomen effi-  
cere . nam qua ratione credidissent amici , sibi Ciceronē fuisse nomē  
mutaturū , nisi fuisset apud Romanos ea mutandi nominis cōsuetudo ?  
Quid illud annon apertissimū est , omnes qui se in adoptionē alicui  
dabant , noua semper adoptantiū nomina sumere solitos ? ut Scipio  
Aemilianus , Fabius Rutilianus , Caesar Octauianus ? Quid in  
adeundis hereditatibus annon obseruatū fuisse legimus , ut eius a quo  
essent heredes instituti nomen acciperent ? sic M . Brutus Quinti  
Capionis nomē assumpsit , vnde postea Q . Capio Brutus fuit  
appellatus , sic Pomponius Atticus , propter Q . Cæciliū heredi-  
tatem Q . Cæcilius Pomponianus a Cicerone dictus fuit . quin  
etiam sæpenumero fiebat , ut qui testamenti factionem haberent ,

cum aliquem sibi ciuem heredem eligerent , eum iuberent nomē im-  
mutare . quod ad Atticū scribens his verbis ostendit Cicero : Dolas  
bellam video Liuiæ testamento cū duobus cohæredibus esse in triēte,  
sed iuberi mutare nomen, est πολιτικὸν σκέμμα rectū ne sit nobili  
adolescenti mutare nomen mulieris testamento . Quid præterea?  
nonne multi sibi ab aliis oblata nomina libenter arripuerunt ? præser-  
tim si noui homines fuissent , et aliquid honoris aut gloriæ nomen  
illud nouum allaturum videretur ? vnde enim Cato ille maior , vir  
insignis omni virtutū genere nomen habuit ? annō ex prudentia , atq;  
calliditate sua ? cum enim esset prorsus ignobilis , et in agro suo pa-  
terno Tusculano Priscus vocaretur , à M . Valerio Flacco Ro-  
mam deductus , nō ita multo post ob eximiam virtutē Cato cogno-  
minatus est . nam R omani ( quod ait Plutarchus ) eum in quo mula-  
tarum rerū vsus atq; scientia sit , Catonē nominant . quod quidem  
nomē adeo sibi libenter adoptauit , vt se nō aliō nomine postea passus  
sit vnquam appellari . Quid Valerius Publicola , nō ne libenter  
honoris gratia , sibi oblatum à populo R omano , nomen arripuit ?  
Quid Plato cum prius Aristocles ex aui nomine vocaretur , annō  
cum propter egregiam humerorū latitudinē , et frontis amplitudinē ,  
ab iis qui cum eo versabantur , Plato cognominatus fuisset , tam  
cupide nomen illud amplexus est , vt nunquam postea dimiserit ?  
Quid Theophrastus Eresius , cui Tyrtamo nomen antea fuerat ,  
nonne cum eum ob diuinā elocutionem præceptor eius Aristoteles ,  
Theophrastū appellaret , sibi postea tanquam propriū nomen illud  
asciuit ? et in operibus suis inscribere nō dubitauit ? Quid Home-  
rus , cū antea Melesigenes diceretur , annon postquā cæcus factus est ,  
et ducis indigeret , Homerus dictus est ? Iones enim et Cumæi



captos oculis, Homeros vocât, eo quod ducibus egeant. hoc igitur  
nomē reiecto priore semper postea tenuit. Quin etiâ nonnullis cla-  
rissimis mulieribus, hanc nominis mutationē vehementer placuisse le-  
gimus. mater enim Euandri illius Arcadis, quæ latinarū literarū au-  
ctor et inuētrix fuisse dicitur, cū antea Nicostрата vocaretur, postea  
propter diuinādi sciētiā, et diuinorū carminū interpretationē Carmē-  
ta fuit appellata. Tanaquil autē sapiētissima jæmina, Tarquinii  
Prisci cōiunx, postquā Romanam venit, maritumq; suum regē vidit,  
nomē etiā Romanū habere voluit, itaq; Caia Cæcilia dicta est.  
Quod autē prætermittēdi, gentis atq; familiæ, nominis, antiquissima  
cōsuetudo sit, declarant omnes fere Græcorū appellationes, in quibus  
vel à regionibus, vel à ciuitatibus atq; oppidis, sibi nomē assumunt.  
cū tamen credibile sit, in suis regionibus ac ciuitatibus, suarū fami-  
liarū nomina, singulos ab aliis habuisse distincta. sic Aristoteles Sta-  
gyrites inscribitur, Plato Atheniensis, Euclides Megarēsis, Theodo-  
rus Cyrenaicus, Pythagoras Samius; Gorgias Leontinus, Pindarus  
Thebanus, Pittacus Myrtenus, Thales Milesius, Chilo Lacedæ-  
monius, Bias Priēsis, Periander Corinthius, Cleobulus Lyndius,  
Solon Atheniensis, aliiq; innumerabiles. Quin etiā apud latinos eius-  
modi nonnullę sunt inscriptiones, ut T. Liuius Patavinus, Apuleius  
Madaurēsis, Lucanus Cordubensis, Silius Italicus, Ausonius Bur-  
degalenensis. multa prætereo consulto, P. C. ne videar magis aliorū  
exēplis, quā rationi cōfidere. docet enim nos ipsa ratio nihil referre, nō  
tantū quo singuli hoīes, sed etiā quo quaq; res noīe vocetur. modo  
tale nomē imponatur, ut p̄ illud res ea quā significare volumus, intel-  
ligi possit. Sunt enim ab ipsis hoībus excogitata noīa, nō alia sane de  
causa, nisi ut per ea res iter se discernātur. nā qua ratiōe nisi noīa rebus

addantur, hæc ab illa distingui atq; separari poterit? Sed tamē quoties inter homines, de rebus ipsis conuenit, nihil oportet ( vt apud Platonem ait Socrates ) de nominibus esse sollicitos. quoniā nullum alium nobis vsum nomina præstant, nisi vt per ea res intelligamus. quæ cum à nobis perceptæ fuerint, possumus eas, quocunq; nobis placuerit, nomine vocare. quid enim prohibet, quo minus inter se conuenire possint homines, vt quē nunc equū ( exempli gratia ) vocamus, postea bouē appellent, et contra, quē nunc bouē, equū postea nomenclent? cum enim homines ipsi, nominū formatores fuerint, et noua semper nouis rebus nomina imposuerint, etiam arbitrio suo, possunt ea quoties sibi placuerit, immutare. quod si post homines natos, et primā nominū impositionē, veteres illi statuisent, nulla esse mutanda nomina, certe nunquā tanta linguarum varietas accideret. sed iisdem nominibus Hebræi, Græci, Latini, ceteraq; nationes omnes vterentur. nunc cum vnaquæq; natio suo arbitrata sibi nomina fingat, idq; licere omnes arbitrentur, fit vt non tantū in diuersis prouinciis, sed etiam in eadē regione, atq; adeo ciuitate, res vna variis nominibus appelletur. tantumq; in hac nominū mutatione consuetudo valet, vt nō tantum homines, belluæ, plantæ, res vnīuersæ, quæ ad vsum hominum accommodantur, sed etiam flumina, montes, regiones, vrbes, vetus nomen amittant, et nouū accipiant. e quibus exempli tantū gratia nōnulla cōmemorabo. Tyberim flumi-  
niū, ab antiquis Albulā dictū fuisse legimus. Padum scribit Plinius à Liguribus Bodincum olim appellatum fuisse. quē antiqui Rubiconē vocabant, vulgo nunc Pisatellum dicunt. quē Lirim veteres, nos Garilianum. Quid annon vulgo nunc Mongibellus, mons ille Siciliæ dicitur, quem Aetnam veteres appellarunt? nunc

caput solis vocant, quod olim Zephyrum promontorium. colonam  
vero, quod aliàs Lacinium. Quid regiones idem ne seruant per-  
petuo nomen? minime vero. nam Italia quot nominibus appellata  
fuit? modo ænotria, modo Hesperia, nunc Ausonia, nunc Saturnia,  
nunc Latium. quid Italia populi, vbi Samnitū hoc tempore? vbi  
Sabinorū? vbi Veientium, vbi Volscorū nomen? cū tamen adhuc  
eādem regiones sed aliis nominibus supersint. Iam vero ciuitates  
in Italia plurimæ, sicut alibi passim, nouum nomen sortitæ sunt.  
Papia nunc est, quod olim Ticinū fuit. quam nos Paduam voca-  
mus latini Patauium dicebant. quæ castelli ciuitas vulgo dicitur,  
olim Tifernum fuit. quod Vastum hodie vocant, apud antiquos  
Istonium vocabatur. Populonia dicebatur aliàs, quod hoc tempore  
Plumbinum. Cornetum vulgus appellat, quod Ptolemæus castrū  
nouum. Traiectum nunc est, quæ iam pridem Minturnæ fuerant.  
Sed quid hæc pauca persequar? cum & in ipsa Italia, & in aliis  
Prouinciis omnibus. omnia fere vetera nomina sint penitus immu-  
tata? recte enim poeta quidam cecinit. Mors etiam Saxi nominis  
venit. Videntur enim homines semper hac nominum  
varietate magnopere delectati, non tantum in suorum nominū mu-  
tatione, sed aliarum etiam pene omnium rerum, vt nihil omnino  
reperiatur, quod idem perpetuo nomen apud omnes nationes con-  
seruare posse videatur. Quæ cum ita sint, P. C. vobis iam  
apertissime constare potest, nō esse hanc nominis mutationē contra  
omnium consuetudinē, quod aduersarii nimis imperite mihi obiece-  
runt. cum & doctorum hominum, & religiosorum, & Pontificū,  
& omnium deniq; quibuscunq; visum fuerit, hunc esse morem, &  
semper fuisse docuerim, vt & suo sibi arbitrio nomen immutarent,

et ab aliis oblatum quod gratum esset arriperent . quam quidē consuetudinem nulla sit ratio quæ recte possit improbare , cum aliud atq; aliud , prout hominibus placuerit , res singulæ nomen accipiant . Satis mihi multa verba fecisse videor , quare nominis mutatio sit , et a legibus concessa et a cōmuni cōsuetudine comprobata . Restat vt etiam de honestate atq; decoro nōnulla dicamus . quod cum fecero , perorabo . hoc enim tertium fuit eorum quæ mihi accusatores obiecerant . cui , quanquā ex iis quæ iam dicta fuerunt , satis responsum esse videri possit ( nihil enim cōtra decorum est , quod ex communi consuetudine , legibus ipsis concedentibus fiat ) tamen nequid omnino dubitationis in cuiusquam animo relinquatur , etiam huic parti respondebo . Opponunt mihi grauissimū honestatis atq; decori nomē , quo fieri non potest , vt non vehementissime commouear . etenim id vnum semper ab ineunte adolescentia summo studio conatus sum , vt nihil vnquam aggredi tentarē , quod aliquo modo turpe atq; indecorum esse videretur . quod si mutatio nominis contra decorum atq; honestatē esset , vani fuissent omnes conatus mei , vani labores , vana omnis industria . Quid enim mihi vita prodesset honestissime atq; decentissime acta , si nomini meo turpitudinis atq; dedecoris nota iniusta esset sempiterna ? verū vt in aliis quæ iam aperte refutauimus , ita etiā in hac parte me accusatores iniuste calumniantur . quid enim turpitudinis habet , quid indecori , nominis mutatio ? num quia res iniusta sit atq; impia ? sed quæ iniustitia , quæ impietas , hac in re esse potest ? Deorum ne religio , mutando nomine violatur ? generis ne humani societas offenditur ? est ne hac in re aliqua aut libidinis , aut auaritiæ , aut vllius improbitatis suspicio ? est ne aliquid eiusmodi , quod animū à virtute alienū ostendere possit ? nihil sane hor-

rum nō solum dici, sed ne fingi quidē potest. cur ergo indecorū? an quia sapientes et eruditi homines ab eo facto refugiant? immo vero iam a nobis copiose demonstratū est, plurimorū hominū qui doctrina atq; sapientia excelluerunt exempla reperiri, qui sibi nomina cōmutarunt. quod autē sapientū exemplo fit, id etiā omnes recte fieri existimant. quos enim imitari debemus, nisi doctos et sapientes viros? quorū nobis vitam, quorū facta atq; dicta proponenda putemus, nisi eorū qui quod pulcherimū factū atq; dictū est optime calluerūt? quod si rectū est clarissimorū hominū exempla sequi, profecto erit etiā decorū atq; honestū. quod enim recte fit, id vt honeste quoq; decoreq; fiat necesse est. cur hoc (inquam) indecorū? an fortasse quia lege prohibitū est? at hoc etiā ostendimus, tam a diuinis quā ab humanis legibus aperte concessum esse. quod autē iure conceditur, id iustum esse nemo nō intelligit. nam quæ legum esset utilitas aut vsus, si quæ sunt iniusta nominatim cōcederent? ergo sequitur vt idem etiam decorum sit. Quid ad hęc cōtra dici potest? vel enim hoc factū meū iustum est, vel iniustum. sed iniustū nō esse (propterea quod et ab eruditis atq; sapientibus viris vsurpetur, et a legibus permittatur) ostensum est. restat igitur vt iustum esse necessario concludamus. Id nē igitur vos P. C. quod iustum est, contra honestatem atq; decorum esse iudicabitis? profecto nunquā cadet in istam sapientiā vestram tam iniquū iudicium. quis enim non videt hęc argumenta luce esse clariora? sed quibus tandē rationibus aduersarii nominis mutationē contra decus atq; honestatē esse probare conati sunt? primū (opinor) hoc eorum est argumentū: is quē veteris nominis poenitet, omnes in leuitatis atq; inconstantie suspicionē inducit, nihil autē incōstantia atq; leuitate turpius, aut magis indecorū videtur. qua in parte

possum id ego dicere, quod olim vulpes cum in cuiusdam artificis domum esset ingressa, pulchramque capitis imaginē intueretur, d. quale caput ( inquit ) sed cerebrum nō habet . nam qua ratione probatis aduersarii, eum in leuitatis atque inconstantie suspiciōē incidere, quem veteris nominis pænitet? quæ causa est, cur ea suspicio suscitari debeat? cur inconstans aut leuis exislmandus est, qui dolet ea re quam immutatā esse cupiat, cū præsertim eam mutare cōcessum sit? eadem ratione dicitur leuis, quem ignobilitatis, quem paupertatis, quem ægritudinis, quē vitiosorum parentum, quem denique status sui pænitet . Quod si verum sit, erunt inconstantes omnes, qui sua virtute familiam nobilitare, rem familiare augere, valetudinem tueri, vitia parentum occultare, dignitates acquirere contendunt . quo quid absurdius dici potest? cur autē magis inconstans esse videatur, qui nomen, quam qui vitæ genus mutat? eorum enim omnium quæ a parentibus accepimus vna ratio esse debet, vt ea vel æque cōseruari debeant, quāuis minime grata sint, vel æque mutare liceat . quod si debent omnia cōseruari, profecto leuis et inconstans erit, quicunq; eorum aliqua mutauerit . quo fiet vt in eodem statu sit vnus cuius perpetuo viuendū, neque quisquā ignobilis et obscuro loco natus vnquam emergere, atque in luce versari possit . sed etiam si aut felici ingenio, aut prospera fortuna adiuuetur, tamen ei necessario delitescendum sit . quod si hæc absurda sunt, et pleraque mutare licet eorū quæ a parentibus accepimus, omnesque laudantur, qui se suamque familiam quotidie reddere conantur illustriorem, quiq; semper in melius vitæ suæ rationes promouent, cur is inconstans appellandus est, qui cum industria sua, labore, diligentia iam emergere cæperit, et omnia ferè quæ a maioribus suis acceperat immutauit, nomen etiam



comutare velit. quis enim est proprie leuis & inconstans appellandus? aut hoc nomen in quē peculiariter cadit? opinor in eum qui nequaquā in vna recta sententia persistit, sed modo hoc, modo illud concupiscit. qui vero re multum deliberata & perpensa, tandem statuit, nouū sibi nomen adoptare, quo postea per omne vitæ suæ spacium utatur, quis eum leuem aut inconstantem iuste potest appellare? non hercle magis quam qui ruri natus, aut in aliqua humili atq; abiecta patria, tandem eam deserere constituit, atq; in florentissima ciuitate viuere. quod si nemo leuem eū existimat, qui nobilissima ciuitatis ius acquirere contendit, & pristinam penitus patriam deserit, cur is leuis habeatur, qui pulchrum sibi nomen querit, vetus repudiat? cum præsertim ea fuerit antiquissima consuetudo, ut qui noui ciues fierent, etiam noua nomina sumerent? At mutatio nominis grauitatem non habet. immo vero tantam habet, quantam etiam mutatio patriæ vel ciuitatis. quare Cato Censorius cū ex Tusculano Romanus ciuis esset factus, etiam ex Prisco (sic enim prius vocabatur) factus est Cato. quod si grauitatē nō haberet mutatio nominis, cur sibi Pontifices nomen immutarent? cur Christus quibusdam discipulis suis nouum nomen imposuisset? cur eiusdem legati quoscuq; sacris iniunctis eis nomen etiam mutare voluissent? cur etiam nostro tempore quoties alienigena Christianus sit pristinum nomen repudiat? Sed iterum insurgit atq; eloquio tonat accusator Fabius. omnes (inquit) qui sibi nomen mutant, parentum primum mandatum contemnunt atq; despiciunt, parentum prima munera paruipendunt, parentum voluntatem irritam faciunt. Quis has tam acres exclamationes non vereatur? quis hæc eloquentiæ fulmina nō pertimescat? equidē toto corpore perhorrescebam, cum illud parentū repeti toties audire.

itaq; quo me verterem nesciebam. videbar enim videre, tam acri lugebriq; accusatoris vociferatione, a mortuis excitatos adesse cum flagello parentes meos; qui me grauiter increpant, et verbera minarentur, nisi pristinum nomen resumerem. hoc certe tanti ponderis est, quanti illud quo me nuper idem accusator grauissime insectatus est. Cum enim nubilo caelo pluuiog; mihi domo exeundū esset, et toga domi relicta, pallio breuiori in publicum prodiiſsem, vt primum iste vidit, summa voce multis audientibus exclamare cepit, me decorum non seruire, nimis inhoneste gerere, sibi ceterisq; collegis dedecori esse, fore vt breui me leuitatis eius poeniteret. iudicium videlicet hoc iam tum mihi minabatur. itaq; miror cur hoc tantum crimen relictae domi propter pluuiam togae, in accusatione sua non inseruerit, et me nō tantū nomē sed etiā vestes et habitū mutasse coarguerit. en virū dignissimū qui moribus praeficiatur. quid in grauiſſimis criminibus eum facturū existimamus, qui leuiſſima tam acriter insectetur? Sed illud mihi Iuuenalis in mentē venit vsurgare.

Vltra Sauromatas fugere hinc libet, et glaciale  
Oceanum, quoties aliquid de moribus audent

Qui Curios simulant, et Bacchanalia viuunt. Indocti primum. nam si mihi liberet accusare, facile possem ea de aduersariis meis proferre, testimoniisq; comprobare, quae certe vobis, P. C. longe grauiora et maiori poena digna, quam nominis et togae mutatio viderentur. sed habeant per me totum vitae suae spacium multis flagitis inquinatū, solum ac liberum. nihil à me de grauiſſimis vitiis peccatisq; suis audiant. neq; enim id facere possum, a quo me primo natura deduxit, deinde consuetudo remouit, postremo voluntas auocauit. satis est mihi tam caste atq; integre viuere, vt nemo

178  
iuste me accusare possit, aut si accuset aperte calumniari videatur. quo modo autem ceteri viuant, quos emendare ego, atque in rectam viam reducere non possum, non admodum mihi curandum esse conseo. Sed ad rem redeamus. Quod nam est hoc parentum mandatum, quod a me contemptum et spretum dicis Fabi? solent ne parentes filiis suis precipere ne nomen mutant? certe si ita est, grauiter peccant, quicumque sibi nomen mutant. parentum enim voluntati quae non iniqua videatur, semper obtemperare filii debent. verum quid aliis accadat nescio, mihi certe nunquam parentes mei, ne nomen immutare, praeciperunt. itaque non intelligo cur a me parentum mandatum neglectum fuisse dicas. Sed quid si viuo patre et consentiente, et approbante nomen mutauit? eris ne tamen tam improbus, ut affirmes a me contemptum fuisse parentum mandatum? Tertius enim hic annus est, ex quo quaedam opera mea, sub eo nomine quod mihi adoptauit, typis excussa et peruulgata sunt, pater autem meus anno superiore meis in complexibus animam egit, contra cuius voluntatem atque nutum quo ad vixit, non modo quicquam feci, sed ne facere quidem tentauit. quem ita diligenter obseruabam, ut parentem decet, ita vehementer amabam, ut eum qui licet in tenuissima re familiariter versaretur, nulli tamen unquam sumptui pepercit, ut me bonis in artibus atque disciplinis eruditum aliquando videre posset, ita cum eo consilia omnia mea communicabam, ut ne latum quidem (quod aiunt) vnguem, ab eius sententia mihi discedendum putarem. hoc igitur ille nomen approbavit. huic mutationi consensit. hoc me nomine saepius appellauit. adsunt testes ex municipibus meis plurimi, summa virtute, fide, religione viri, quibus hoc notissimum est, qui saepe hoc a patre audierunt,

qui de honore, atq; dignitate mea solliciti sunt, qui sua sponte Me-  
diolanum ad hoc iudicium testimonium dicturi venerunt. hos si vos  
bis placuerit P. C. testes audietis. quamuis hoc minime neces-  
sarium esse videatur. neq; enim legislatores, qui nominis mutationem  
permiserunt, hanc exceptionem addiderunt, extra quam si parenti-  
bus minime placuerit. itaq; crediderim ne a parentibus quidē impe-  
diri filios legitime posse, quo minus aliqua probabili de causa, si vi-  
sum eis fuerit, nomina mutent, quamuis illud ego magnopere lau-  
dem, atq; approbem, nihil sine parentum consilio, dum viuunt a  
filiis esse faciendum. sed postquā illi mortem obierint, tum cuiq;  
liberum atq; integrum esse, quod vitæ genus sequi, quod nomen  
habere velit. præclaris enim ingeniis sapissime accidit, vt vel im-  
peritia, vel ignobilitate parentum vilia atq; abiecta nomina sortiana-  
tur. qua potissimum de causa factum existimarim, vt nomina quæ  
minime grata fuerint, mutare, lege concessum sit. quod si parentes  
pulchra filiis suis nomina studerent imponere, magnum certe illis  
ornamentum adiungeretur. Tria sunt enim quibus si forte priuati  
sunt, magno studio parentes acquirere filiis debent, patriam, no-  
men, artes. quisquis igitur obscuro loco natus pater, claros habere  
filios concupiscit, primo nobilem, quam incolat, sibi ciuitatem eligat,  
quoniam nō tam frequenter familiæ, quam ciuitatis nomen quaeritur.  
vt non sine causa Seriphius quidam obiecisse Themistocli dicatur,  
non illum sua, sed patriæ gloria splendorem affecutum, cui tamen  
ingeniose Themistocles ita respondit. nec hercle si ego Seriphius  
essem, nobilis, nec si tu Atheniensis esses, clarus vnquam fuisses.  
hoc ergo in potestate patris primum est, vt quam velit filio patriam  
paret, deinde vt elegans atq; egregium nomen eidem imponat, quæ  
certe

17  
certe res magnum plerisq; decus et ornamentū asferre solet . postremo ut ingenuis eum artibus erudire contendat , qua praecipue in re splendoris omnis et gloria principium est . quod si quis forte parentum culpa priuatus his rebus fuerit , in eius est arbitrio , atq; potestate situm , si voluerit , ut et patriam , et nomen , et artem cōmutet , neq; vlla lex , aut vlla ratio reperitur , quae illum iuste possit impedire . Sed vrgent aduersarii valida quadam ut ipsi existimant ) et quasi cornibus armata argumentatione : qui nomen ( inquit ) familiae mutat , aut praetermittit , is vel claro illustriq; loco natus est , vel certe obscuro atq; ignobili . Si claris est parentibus ortus , nominis mutatione genus et nobilitatem contemnere videtur , et a maiorum suorum lumine , in tenebras decurrere . si autem obscuris et humilibus , seipsum eadē nominis mutatione prodit , et ignobilitatē suam coram omnibus confitetur . hoc Chrysippeum esse Barones isti putant , atq; eiusmodi ut nō modo à me , sed ne à Carneade quidē , si reuiviscat , ullo modo dissolui possit . itaq; diu , atq; ad nauseam vsq; sunt in hac parte cōmorati , totaq; nugarū plaustra super hac vna ratione fuderunt . Sed videamus quid ea valeat , cuius ponderis sit . claro loco natus nominis mutatione fit ( aiunt ) obscurior . quomodo quāso ? num quia vilius et abiectius sibi nomen adoptet ? quis autem adeo stupidus est , ut hoc faciat ? quisquis enim sibi nomē mutat , elegantius et splendidius quærit , nō autem sordidius et obscurius . qua ratione ergo fit obscurior ? num etiam si clarius et nobilius sibi nomen assumat ? quis tam rerum ignarus est , ut hoc affirmare audeat ? Clarus erat Pauli Aemilii filius , datus est in adoptionem Scipionū familiae , nomē mutauit , postea Scipio fuit appellatus . quid ? ea ne de causa contempsisse nobilitatem suam videtur ? ea ne

de causa à maiorum lumine in tenebras decucurrisse? Prò Deum  
atq. hominum fidem, quantum stuporis, quantum imperitiæ præ se  
ferunt istæ aduersariorum rationes. nobilissimus erat Octavius,  
eum C. Caesar Dictator adoptauit, nouū nomen sumpsit, Caesar  
postea dictus fuit. hac aduersariorū meorum argumentatione, factus  
est scilicet ignobilior, genus suum contempsit, tenebricosus quidam  
euasit. hæccine sine risu quisquam audire potest? quot homines cla-  
rissimi reperiuntur, et apud veteres, et apud recentiores, qui relicto  
familiæ suæ nomine, in duas aut tres clariores familias insinuantur?  
Sed ne historiam contexere videar, vno tantū summi hominis exem-  
plo contentus ero, qui nostra memoria vel omnium eruditorum cele-  
berrimus fuit. Aldum enim audio, virum illum, cui tantum et  
Latina, et Græcæ literæ debent, Bassianatem fuisse. qui tamē pri-  
ma ætate cum iam floresceret, se Romanum primo scribere cepit.  
vidi ego permultas eius epistolas, in quibus ita nomen suum inscri-  
bebat. Aldus Romanus. deinde non ita multo post, Manutiorū  
familiæ nomen assumpsit, et se longo tempore Aldum Manutium  
Romanum inscripsit. postremo cum Alberti Pii Carporum prin-  
cipis amicissimus esset, etiam in eius familiam insinuauit, et tandē,  
Aldus Pius Manutius Romanus factus est. Hæc autem ideo  
commemoro, non vt aliquid de tanti viri fama detrahā, quæ sem-  
per omnium maxime sum admiratus, sed vt apertissime doceam,  
hanc semper fuisse doctorum hominum sententiam, vt nequaquam  
contra decorum esse censerent, et suum et familiæ nomen vel mu-  
tare, vel penitus relinquere, et alia noua sumere. nam ipse Aldi  
filius, iuuenis cum summa eruditione, tum orationis elegantia præ-  
stans, hoc tempore duobus parentis nominibus relictis, tantum se



18  
Paulum Manutium inscribit. Quod autem aduersarii dicunt, qui sit obscuro loco natus, mutatione nominis ignobilitatem suam coram omnibus confiteri, non satis (ut ingenae fatear) intelligo quid sibi velint. nam qua ratione mutando nomine ignobilitas ostenditur? an quia tantum ignobiles mutare nomen soleant? at hoc falsum esse ne aduersarii quidem ipsi negabunt, cum plurimi nobilissimi viri nomina mutasse legantur. deinde quomodo coram omnibus ignobilitatem confitentur? utrum coram eis, a quibus cognoscuntur, an quibus ignoti sunt? si coram eis, a quibus cognoscuntur, nullam ignominiam aut dedecus affert ignobilitatis confessio, quin potius arrogantes haberentur, si se nobiles esse dicerent. Itaque multi praestantissimi viri generis etiam nouitate gloriati sunt, quod a se genus suum, cum antea fuisset obscurum, illustrari capisset. Si coram eis, quibus ignoti sunt, hoc erit monstri simile. quis enim eum ignobilem esse credit, quem ne natum quidem nouit? quare quod hac in parte reprobant, nihil omnino esse video. Sed tamen id concludam, quod quicumque bene senserint, verissimum esse mihi facillime concedent, cum in rebus fere omnibus, tum multo magis in disciplinis atque literis, parum admodum, aut nihil ad gloriam et honorem prodesse, quo quisque genere natus esse dicatur. ut enim quisque doctissimus et laboriosissimus est, non ut generosissimus et nobilissimus, ita in amplitudine atque celebritate nominis maxime excellit? Quid enim obsuit ad aeternam gloriam Socrati, quod statuarii filius esset? quid Euripidi quod olitoris? quid Demostheni, quod fabri ferrarii? quid Virgilio, quod figuli? quid Horatio, quod Libertini? quid plurimis aliis, quorum nomine nihil hoc tempore clarius? desinant igitur aduersarii de genere verba

facere, quod utrum clarum an obscurum sit, nihil nobis Musarum cultoribus omnino curæ esse debet. concedant tandem id quod inspicari non possunt, siue quis nobilis sit, siue ignobilis, honeste atque decore, si voluerit, immutare nomen posse. Cum annis superioribus in Ferrariensi Gymnasio iuri civili operam darē, mihi fuit ætatisissima familiaritas et consuetudo cum Bartholomæo Ferrino, viro cum morū integritate, tum eruditione certe singulari atque admirabili, cuius morte (nam anno superiore in Regiensi legatione mortuus est) nihil mihi iam pridē acerbius euenit. is igitur, ut mihi narrabant eius familiares, cum esset obscurissimo loco natus, tamen propter excellens ingenium breui tempore cæpit emergere, notusque pluribus fieri. donec eius fama impulsus Hercules Attestius Ferrariæ princeps, eum accersiuisset, et scribam suum à secretis esse voluit. Sed cum eum admodum pauperē esse videret, cuiusdam Ferrarii mercatoris ditissimi filiam, quam ille vnicam habebat, in matrimoniū ei collocauit. itaque cum iam hac ratione ditior et clarior factus fuisset, vnaque cum socero qui venale ferrum habebat, habitaret, se Ferrinū à soceri ferro cæpit appellare, suaque familiæ nomen suppressere. quæ res illi non modo nulli dedecori fuit, sed maximū etiam ornamentum attulit. nam ipse Princeps Hercules eo nomine tantopere delectatus est, ut eum postea nunquā alio quam Ferrini nomine vocauerit. quē secuti quicunque eum norant Ferrinū appellabant. atque ita factū est, ut nō ita multo post nullū esset in ea ciuitate clarius nomen, ut etiā nobilissimæ familiæ nouo homini Ferrino cedere viderentur. Potest ne igitur quicquam contra honestatem atque decorum esse, quod sæpiissime maximū honorem et dignitatē afferat? Hæ sunt P. C. rationes, hæ causæ, quibus adductus ego putauī nequaquam crimini

18  
mibi dari posse, si quod non placebat, nomen immutassem. quod  
et ab eruditis viris fieri, et a legibus concedi, et ab honestate atque  
decoro non abhorreere intelligebam. Nunc igitur perorata causa, nihil  
aliud superest P. C. nisi ut vos orem obtesterque per eam, quam  
erga me iam pridem ostendistis humanitatem atque benignitatem ves-  
tram, per æquitatem atque clementiam, qua in omnibus iudiciis ve-  
stris uti consuevistis, per summam religionem atque incredibilem sa-  
pientiam, quam in vobis omnes admirantur, ne in hoc iudicio nullo  
meo scelere, sed tantum aduersariorum improbitate conflato, digni-  
tatem eam, qua me vestra sponte decorastis, et amplissima benefi-  
cia, quæ in me contulistis, grauiore sententia deformare atque obscu-  
rare velitis. si me in hoc iudicium non crimen aliquod quæstionis pro-  
prium, non aliquid eiusmodi, quod sit à lege seiunctum, aut ab ho-  
nestis vitæ rationibus alienum, sed accusatorum inuidia, nocendi-  
cupiditas vocauit. nolite quaeso committere, ut quem vos immortalis  
penè beneficio nuper affecistis, eundem hoc tempore maleuolorum  
iniquitate circūuentum, omni dignitate atque honore spoliatis. si me a  
pueritia deditum iis disciplinis fuisse non ignoratis, quibus instruimur  
ad honorem, ad gloriam, ad dignitatem, si bonorum hominum  
industriam continentiamque semper imitari conatus sum, si cum pri-  
mum mihi per ætatem licuit, adhortandis, docendis, concitandis ad  
ingenuas artes iuuenibus, de Rep. nostra, quoad facultas mea tulit,  
quam plurimum bene mereri studui, si denique ea quæ nisi vigilantes  
homines, nisi sobrii, nisi industrii consequi non possunt, labore et  
diligentia consecutus sum, obsecro vos P. C. ne patiamini po-  
tius exteras nationes, laborum meorum fructus, quam iuuentutem  
vestram percipere. Mibi quidem hæc patria longe vita mea cha-

rior est, ut optimo cuique civi esse debet, sed siquid in hoc iudicio  
( quod Dii omen auertant ) decretum a vobis fuerit, quod famam  
aut exsimationem meam aliquo modo laedere videatur, omnino mihi  
maximo quidem cum dolore, atque gemitu, sed quodam modo ne-  
cessario patria discedendum erit. neque enim exultantes hac victoria  
inimicos meos, et quotidie mihi insultantes ullo modo pati potero.  
neque in hunc tam mihi iucundum atque gratum conspectum vestrum  
prodire unquam amplius ausim. denique civium, amicorum, fami-  
liarium, cognatorum consuetudinem, congressum, oculos evitare  
contendam. o tristem et calamitosum diem illum, quo mihi a domo  
mea, ab aris atque focus, a domesticorum amplexibus, a patria denique  
recedendum erit. o spem fallacem et inanes cogitationes meas, quae  
in hoc medio vitae spacio franguntur et corruunt, quae in hoc ampli-  
ficata nuper dignitatis curriculo, ante saevissimis tempestatibus obrui-  
untur, quam portum conspiciere possint. nam quid iis dicam, qui  
me frequentes interrogabunt, cur hoc potissimum tempore, in hac,  
quam nobis Dii immortales bonitate sua concesserunt, pacis trans-  
quillitate, in hac studiorum ac liberalium artium restauratione, cum  
reliqui nostri professores omnes in pristinum locum restituti sint, ego  
solus a patria discesserim? potero ne severitatem vestram accusare  
P. C. quos omnes aequissimos et clementissimos esse sciunt? po-  
tero ne cuiquam probare me nullo scelere, nullo flagitio, nullo ne  
mediocri quidem crimine condemnatum, sed adversariorum potentia,  
gratia, libidine, vobis auctoribus oppressum, in eam calamitatem  
devenisse? quisquam ne credet, unam tantum in nomine meo syllaba  
immutatam tantopere vestros animos commovere potuisse, ut ea  
de causa me notandum infamia censueritis? ubi igitur vestra iamprisi-

dem spectata & cognita fides P. C. & ubi religio & ubi misericordia & nihil ne poterit apud vos innocentia mea & nihil amicorum preces & nihil cognatorum lachrymæ & cōtra inimicorum improbitatem, scēitiam, crudelitatem & quid ergo & vitæ integritas ubi consistet, si apud vos locum non inuenerit & quid erit, quod quisquam in hac ciuitate laboris, industriæ, diligentia suæ præmium aliquod se speret assecuturum & qui me, quo tempore vigiliarum mearum fructus aliquos percipere debebam, tam leui accusatione prostratum atq; abiectum videat & Nolite per Deos immortales, P. C. hanc tantam, tamq; exoptatam aduersariis meis asferre latitiam. vt me nunc primum vestris beneficiis florentem, asperiore sententia, tanquam turbine aliquo, aut subita tempestate peruertatis. conseruate ciuem patriæ amantissimum, vobis deditissimum, bonarum artium studiosum. quem si hoc iudicio (quod spero & opto) sententiis vestris absolueritis, addictum & obstrictum perpetuo vobis ac liberis vestris habebitis. Facite vt eosdem vos in conseruanda tuendaq; dignitate mea cognoscam, quos iam in tribuenda atq; amplificanda magno cum gaudio cognoui. sic enim fiet vt mihi posthac duplo magis elaborandum esse statuam. primum vt eo, quod mihi demandastis, munere, quam fieri potest optime perfungar. deinde vt vobis, qui me conseruandum esse censueritis, & aduersariorum maleuolentiæ, atq; inuidiæ resisteritis, pro virili parte quam gratissimum esse ostendam. Quibus ex laboribus meis, mihi credite P. C. efficiam, vt omnis iuuentus nostra fructus vberes diuturnosq; percipiat.

Finis.

Antonius Burgius Mediolani excudebat. M. D. XLVII.





